

LA EPÍSTOLA A LOS HEBREOS

Dios ha hablado por medio de su Hijo

1 Asij ná n̄i ga'i n̄in' ruhua ga'mi Yan'anj rian ni tsínj nata' si-nuguan' Yan'anj rian ni ngüi. Ngaa n̄i nata' ni sí' rian ni xi né'. N̄i ga'i ducúanj ga'mi Yan'anj rian ni xi né' xi'í ni sí'. ²San̄i yyaj ruhua ganahuij xungüi nan, n̄i gui'yaj Yan'anj sisi ga'mi da'ni nga né'. N̄i gui'yaj Yan'anj si gahuin achij sij nahuin ra'a sij daran' si gui'yaj Yan'anj. N̄i xi'í da'n̄ij Yan'anj, n̄i gui'yaj Yan'anj xungüi nga daran' si mán xata' nej. ³N̄i daj rún' ran 'ngo nnee gu'ndi' 'yaj güi, n̄i hué daj digyán da'n̄ij Yan'anj daj hua 'ueé man'an Yan'anj. N̄i daj rún' hua gue man'an Yan'anj, n̄i hué daj hua man'an da'ni huin sí' Jesucristo. N̄i hué si-nuguan' Jesucristo 'yaj sisi man sa' daran'anj. N̄i nucuj n̄in' ruhua si-nuguan' sij. N̄i ngaa guisij na'nin' Jesucristo xi'í si-gaquin' né', n̄i gan'anj gane sij ne' chrej ra'a sa' Yan'anj xata'. ⁴N̄i n̄in' ruhua gahuin achij da'n̄ij Yan'anj rian ni ángel. Daj si sa' n̄in' ruhua hua si-xugüi sij daj nga si-xugüi ni ángel, gui'yaj Yan'anj.

El Hijo es superior a los ángeles

⁵Daj si hua ni'i ni é re' nuguan' nan huin nuguan' ga'mi Yan'anj rian da'ni:

Hué re' huin da'ni.

Yyaj n̄i gahuinj chrej re'.

Daj gataj Yan'anj xi'í da'ni.

San̄i n̄i a 'ngo yun nun gataj Yan'anj nuguan' nan rian 'ngo ángel mánj.

N̄i nan huin ango nuguan' ga'mi Yan'anj xi'í da'ni:

Huēj gahuin chrej sij.

N̄i hué sij gahuin da'ni.

Daj ga'mi Yan'anj xi'í da'ni.

San̄i n̄i a 'ngo yun nun gataj Yan'anj nuguan' nan gunun 'ngo ángel mánj.

⁶N̄i ngaa nicaj Yan'anj da'ni huin sí' si xahua' ga'ngá' sí' chruhua xungüi nan, n̄i gataj snan'anj Yan'anj rian ni ángel:

Ga'mi sa' daran' ni ángel rian xi'í sí'.

Daj gataj Yan'anj.

⁷N̄i gataj Yan'anj xi'í ni ángel nej: Rún' huin nane huin ni ángel.

N̄i daj rún' huin yan'an ngaa naxumanj aca huin ni ángel nej, gui'yaj Yan'anj.

Hué daj gataj Yan'anj xi'í ni ángel.

⁸San̄i hué nuguan' nan gataj Yan'anj rian da'ni:

Hué re' huin Yan'anj.

N̄i n̄iganj nicaj re' sun nné re' chrun xila sa'.

Ni 'yaj nica re' nne sún re' rian chrun xila daj.
⁹Ni aran' ruhuá re' ni'yáj re' chrej nica.
 Sani nitaj si huin xan' ruhuá re' ni'yáj re' chrej quij mánj.
 Xi'í daj, ni nacui Dan'ánj re' man'án re' sisi huaj gahuin nia' ruhuá re' si gahuin nia' ruhua ni dugüí' re'.
 Daj gataj Yan'anj gunun da'ni.
¹⁰Ni gataj ruhua' yún Yan'anj gunun da'ni:
 Hué re' huin Señor.
 Ni asij gaxi'i daran'anj, ni hué re' gui'yaj xungüi nan.
 Ni hué ra'á re' gui'yaj daran' si man ne' xata' nej.
¹¹Ni ganahuij daran' nan.
 Sani niganj gane man'án re'.
 Ni daj rún' gahuin re'e 'ngo atsij, ni hué daj gahuin re'e daran' nan.
¹²Ni daj rún' jnachrún' 'ngo atsij, ni hué daj jnachran' re' xata' nga yo'ój.
 Ni daj rún' naduna né' si-gan' né', ni hué daj naduna re' xata' nga yo'ój.
 Sani man'án re' nitaj si naduna mánj.
 Ni yo' gane re' nitaj aman ganahuij mánj.
 Hué daj gataj Yan'anj nej.
¹³Ni gataj ruhua' yún Yan'anj rian da'ni:
 Gané re' ne' chrej ra'a sa'áj da gurünj ni tsínj unun' nga re' da gahuin ni sij 'ngo riguiya' guta' re' xi'í re'.
 Daj gataj Yan'anj gunun da'ni.
 Sani ni a 'ngo yun nun gataj Yan'anj nuguan' nan gunun 'ngo

ángel mánj. ¹⁴Daj si daran' ni ángel huin si unánj guitsi rian Yan'anj. Ni a'níj Yan'anj ni ángel daj rian né' sisi chracuij ni ángel né' huin né' ni ngüi gane niganj nga Yan'anj xi'í si ganacaj Yan'anj né'.

Una salvación tan grande

2 Xi'í daj ni hua nian si gunun sa' né' nga nuguan' sa' gunun né' sisi si nananj gahuin nini né' rian si-chrej Yan'anj mánj. ²Ni asij ná ni nicaj sun ni nuguan' ga'mi ni ángel rian ni ngüi. Ni daran' ni ngüi gui'yaj gaquin' nun dagahuin ni sij rian Yan'anj. Ni gahuin ni sij castigo. Ni daj rún' gui'yaj ni sij gaquin', ni hué daj gui'yaj Yan'anj castigo ni sij. ³Xi'í daj ni daj ga'ue ganani né' rian castigo sisi si dugumi 'ueé né' nuguan' sa' xi'í si ganacaj Yan'anj né', ruhua á re' ní'. Ni hua sini nata' Señor Jesucristo nuguan' sa' daj rian ni ngüi. Ni ni tsínj gunun nuguan' sa' ga'mi Señor, ni nata' ni sij nuguan' sa' daj gunun né'. Ni gara xina né' nuguan' xanga' nata' ni sij gunun né'. ⁴Ni digyán Yan'anj sisi xanga' si-nuguan' ni sij. Daj si gui'yaj Yan'anj sisi ga'ue gui'yaj ni sij si sa' 'na' xata'. Ni ganahuin ni ngüi a'nan', gui'yaj ni sij. Ni gara yan'anj ruhua ni ngüi ngaa guini'i ni sij nuguan' 'ueé gui'yaj ni sij. Ni ga'ui' Yan'anj Espiritu Santo rian go'ngo ni ngüi daj rún' garan' ruhua Yan'anj.

El autor de la salvación

⁵Ni nun ga'ui' Yan'anj sisi guinica' sun ni ángel rian xungüi ga'na'. Ni xi'í xungüi ga'na' daj a'mi únj rian án re'. ⁶Ni ga'mi 'ngo tsínj rian si-

nuguan' Yan'anj. Ni gataj sí' gunun Yan'anj:

Ni un sin huin ni ngüi sisi nanun ruhua re' ni'yáj re' ni sij únj.

Ni un sin huin, ni 'na' ni'yáj re' ni da'níj ni ngüi únj.

⁷Ni gui'yáj re' sisi doj gahuin lij ni sij rian ni ángel.

Ni daj rún' 'yaj ni tsínj ngaa guta' ni sij corona chra' ngo rey, ni hué daj gui'yáj re' nga ni sij.

Ni gahuin 'ueé ni sij, gui'yáj re'.

Ni ga'uí' re' sisi guinicaj sun ni sij rian daran' si gui'yaj ra'á re'.

⁸Ni gui'yáj re' sisi guinicaj sun ni ngüi rian daran' rasun.

Daj gataj tsínj daj gunun Yan'anj.

Ni ngaa hué daj gui'yaj Yan'anj, ni huin ruhuaj gata sisi 'ngo dagahuin daran'anj si-nuguan' ni sij. Sani ni'í né' yyaj sisi achin dagahuin daran'anj rian ni sij. ⁹Sani ni'yaj né' Jesús. Ni gui'yaj Yan'anj sisi doj gahuin lij Jesús rian ni ángel. Sani yyaj ni gahuin 'ueé nin' sij. Ni gahuin achij nin' sij, gui'yaj Yan'anj nej. Ni hué daj gahuin guiran' Jesús sayun xi'í si gahui' sí'. Ni gui'yaj Yan'anj sisi guiran' Jesús sayun gahui' sij xi'í daran' né' huin 'ngo sinduj gui'yaj Yan'anj xi'í né'.

¹⁰Daran' ni rasun ni güenda Yan'anj huin. Ni huin ruhua Yan'anj sisi daran' ni da'ni gane 'ueé rian hua sa' nne Yan'anj. Ni xi'í Jesucristo huin sisi nacaj Yan'anj ni ngüi. Ni gani ruhua Yan'anj sisi gahuin sa' nin' Jesús xi'í sayun guiran' sij. Ni ganacaj Yan'anj né' xi'í Jesús. ¹¹Ni uyan hua chrej

Jesús nga chrej né' huin né' ni ngüi ganahuin sa' rian Yan'anj xi'í Jesús. Xi'í daj ni nitaj si na'aj Jesús gataj sij sisi né' huin jnánj sij nga xica'uij sij. ¹²Ni gataj Jesús:

Natáj si-xugüí re' rian ni jnān.

Ni ga'mi sa'áj xi'í re' scanij ni ngüi nico' man'án re' huín re' Yan'anj.

Hué daj gataj Jesús rian Yan'anj.

¹³Ni gataj ruhua' yún Jesús:

Niquinj yu'uj nan nga ni da'ní riqui Yan'anj riānj.

Daj gataj Jesús xi'í né'.

¹⁴Ni huin né' da'níj Yan'anj. Ni hua nnee cúj né' nga tun man'an né'. Ni hué gue daj gahuin Jesucristo. Ni ga nnee cúj sij nga tun man'an sij nej. Ngaa ni ga'uej ruhua sij gahui' sij sisi gui'yaj gana sij rian sichre. Ni sichre 'yaj sisi ahui' né'. Ni ganahuij si-fuerza sichre, gui'yaj Jesús. ¹⁵Hué ducuanj daj, ni gahuin ni'nij rian daran' ni ngüi xu'ui' gahui', gui'yaj Jesús. Daj si ya'yoj nani ruhua daran' ni ngüi xi'í si gahui' ni sij. ¹⁶Ni nun ga'na' Jesús chra'cuij sij ni ángel mánj. Sani ga'na' sij chra'cuij sij né' huin né' ni da'níj Abraham huin tsínj gane asij ná. ¹⁷Xi'í daj ni hua nian si 'ngo ga gue Jesús daj rún' hua ni jnánj sij. Ngaa ni guisij sij gahuin sij 'ngo chrej huin achij rian Yan'anj xi'í né'. Ni ga'ue nahuin yaco ruhua sij ni'yaj sij né'. Ni niganj 'yaj sa' sij nga né'. Ni naránj sij rian si-gaquin' ni ngüi. ¹⁸Ni hué man'an Jesús guiran' sayun xi'í si gatsij sichre niman sij. Xi'í daj ni gahuin nucua'j sij chra'cuij sij ni mun'ún' ngaa atsij sichre niman né'.

Jesús es superior a Moisés

3 Hué dan ni gahuin sa' niman án re' rian Yan'anj huin ni é re'

jnān nga xica'uī. Nī gaquínj Yan'anj nne xata' man'an án re' sisi guinicaj dugüi' a ni é re' nga Cristo Jesús. Xi'í daj xacaj ni é re' cuenta xi'í Cristo Jesús huin sij tsínj ga'níj Yan'anj ga'na' digyán chrej sa' gache né'. Nī huin sij 'ngo chrej huin achij nun xi'i' sij xi'í' rian Yan'anj. Nī nata' né' rian ni ngüi sisi xuman ruhua né' ni'yaj né' Jesús. ²Nī 'ueé gui'yaj sun Jesús ni sun ga'nin' Yan'anj sun rian sij daj rún' gui'yaj sun sa' Moisés si-sun Yan'anj xi'í ni ngüi nico' Yan'anj. ³Sani huin achij Jesús rian Moisés. Gui'yó' cuenta sisi daj rún' huin achij tsínj 'yaj hue' rian hue' 'yaj sij, ni da'nga' daj huin achij Jesús rian Moisés. ⁴Daran' ni hue', ni hua tsínj gui'yaj ni hue' daj. Sani Yan'anj huin si gui'yaj daran'anj. ⁵Xanga' ni Moisés huin tsínj gui'yaj sun sa' si-sun Yan'anj xi'í ni ngüi nico' Yan'anj. Sani maan ninanj 'ngo tsínj gui'yaj sun chruhua ducua Yan'anj huin sí'. Nī ga'mi sini Moisés si-nuguan' Yan'anj rian ni ngüi huin nuguan' nata' Yan'anj da' síj rian ni ngüi. ⁶Sani Cristo huin da'níj tsínj ducua. Nī tsínj ducua daj huin Yan'anj. Nī gui'yaj sun sa' Cristo ducua Yan'anj huin né'. Nī hué daj huin né' sisi niganj nari' nucuj ruhua né'. Nī gahuin nia' ruhua né' xi'í si ana'uuj né' si gui'yaj sa' Jesucristo nga né' huin nuguan' a'mi né' rian ni ngüi.

El reposo del pueblo de Dios

⁷Xi'í daj ni ga'mi Espíritu Santo nuguan' nan gunun né':

Sisi gunun yya á re' nuguan' a'mi Yan'anj yyaj,

⁸ngaa ni sí gui'yaj so'o a ni é re' man'an án re' daj rún' gui'yaj

ni tsínj guimán asij ná quij qui'yanj naco ngaa gunun' ni sij nga Yan'anj.

Nī chran' yun'unj ni sij Yan'anj nej.

⁹Yu'uj daj ni chran' yun'unj ni xi a ni é re' man'anj.

Nī gahuin ruhua ni sij guini'i ni sij daj gui'yā nga ni sij.

Nī huíj xia yo' guini'i ni sij sisi sa' nico gui'yā nga ni sij.

¹⁰Xi'í daj ni ga'man ruhuāj guini'inj ni sij.

Nī gataj man'anj sisi niganj gan'anj anéj ni sij riānj.

Nī nun guini'i ni sij daj gui'yaj ni sij guinico' ni sij man'anj.

¹¹Hué dan ni ga'man ruhuāj.

Nī gataj nicāj gunun ni sij sisi nitaj aman gatu ni sij rian naran ruhua ni sij ngāj mánj.

Daj gataj Espíritu Santo gunun ni sij asij ná.

¹²Hué dan ni ga cuidado ni é re' huin a ni é re' jnān nga xica'uī sisi si ga quij niman ni a 'ngo ni é re' nun sa' nun gahuin nini ni é re' rian Yan'anj hua ni'na' xi'í si nun xuman ruhua á re' ni'yaj ni é re' Yan'anj.

¹³Sani go'ngo güi gui'yaj fuerza ni é re' go'ngo ni dugüi' ni é re' sisi ga nica ruhua á re'. Nī da'nga' daj gui'yaj á re' ngaa achin guini güi yyaj. Ngaa ni sí gui'yaj so'o ni a 'ngo a ni é re' man'an án re' xi'í si digya' yun'unj gaquin' a ni é re' mánj.

¹⁴Nī nicaj dugüi' né' nga Cristo sisi ga nica ruhua né' daj rún' ga nica ruhua né' asij sini. Nī hué daj gui'yaj né' da güi ga'na' Cristo aj.

¹⁵Daj si hua gue ataj Yan'anj:

Sisi gunun yya ni é re' nuguan' a'mi Yan'anj yyaj, ni sí gui'yaj

so'lo a ni é re' man'án re' daj
rún' gui'yaj ni tsínj guimán
asij ná.

Daj si gunun' ni sij nga Yan'anj.
Daj gataj si-nuguan' Yan'anj.

¹⁶Ni un sin huin ni tsínj nun
ga'uej ruhua gunun si-nuguan'
Yan'anj, ni gunun' ni sij nga Yan'anj,
ruhua á re' únj. Hué ni sij huin ni
tsínj guiri tsínj gu'naj Moisés yu'uj
gu'naj Egipto. ¹⁷Ni un sin huin ni
tsínj rian ga'man ruhua Yan'anj
huij xia yo', ruhua á re' únj. Hué
ni sij huin ni tsínj gui'yaj gaquin'.
Ni gahui' ni sij quij qui'yanj naco.
¹⁸Ni un sin huin ni tsínj rian gataj
nıca Yan'anj sisi nitaj aman gatu
ni sij rian naran ruhua ni sij nga
Yan'anj, ruhua á re' únj. Hué ni sij
huin ni tsínj nun dagahuin si gataj
Yan'anj rian ni sij. ¹⁹Ni ni' né' sisi
na'ue gunucuaq ni sij gatu ni sij rian
naran ruhua ni sij nga Yan'anj xi'f si
nun guxuman ruhua ni sij ni'yaj ni
sij Yan'anj anj.

4 Hué dan ni hua gue ataj
Yan'anj gunun né' sisi ga'ue
gatu né' rian naránj ruhua Yan'anj.
Nгаа ni ga cuidado go'ngo ni é re'
nun sa' nun si guiri' ni é re' gatu a ni
é re' yu'uj da mánj. ²Daj si daj rún'
gunun ni xi né' nuguan' sa', ni hué
daj gunun né' nuguan' daj, gui'yaj
Yan'anj. Sani gunun yun ni xi né' si
nun guxuman ruhua ni sij nuguan'
daj. ³Sani ga'ue gatu né' rian naránj
ruhua Yan'anj xi'f si xuman ruhua
né' ni'yaj né' Jesús. Ni hua ga'mi
Yan'anj xi'f ni xi né'. Ni gataj Yan'anj:

Hué dan ni ga'man ruhuáj.

Ni 'ngo gataj nicáj gunun ni sij
sisi si gatuj ni sij rian naránj
ruhuáj mánj.

Hué daj gataj Yan'anj xi'f ni sij.

Sani hua guisij ganahuij gui'yaj
sun Yan'anj asij ngaa gui'ya
xungüi aj. ⁴Ni hua 'ngo yu'uj gataj
si-nuguan' Yan'anj xi'f güi chij:
“Naránj ruhua Yan'anj güi chij ngaa
guisij gui'yaj sun Yan'anj daran'
si-sunj.” Hué daj gataj nuguan' daj.
⁵Ni gataj ruhua' yún yu'uj daj: “Ni si
gatuj ni sij rian naránj ruhuáj mánj.”
Daj gataj Yan'anj xi'f ni xi né'.

⁶Hué dan ni achin si gatu da'aj ni
ngüi rian naránj ruhua Yan'anj. Sani
nun gatu ni tsínj gunun sini nuguan'
sa' daj xi'f si nun dagahuin ni sij si
gataj nuguan' daj. ⁷Hué dan ni gani
ruhua' yún Yan'anj 'ngo güi ga'ue
gatu né' yu'uj daj huin güi yyaj.
Daj si ngaa hua gachin nico yo',
ni gui'yaj Yan'anj sisi ga'mi tsínj
gu'naj David nuguan' hua garünj
daj. Ni gataj nuguan' daj:

Sisi gunun yya á re' si a'mi
Yan'anj yyaj,

ngaa ni si gahuin so'lo ni é re'
xi'f nuguan' da mánj.

Hué daj gataj si-nuguan' Yan'anj.

⁸Ni xi'f si nun gatu ni tsínj
israelita rian naránj ruhua Yan'anj,
gui'yaj tsínj gu'naj Josué, ngaa ni
a'mi si-nuguan' Yan'anj xi'f ango
güi naranj ruhua né'. ⁹Nгаа ni ni'
né' sisi ga'ue gatu né' rian naránj
ruhua Yan'anj huin né' ni ngüi nico'
Yan'anj xanga'. ¹⁰Ni tsínj gatu rian
naránj ruhua Yan'anj, ni ga'ue
naranj ruhua ni sij nga si-sun ni
sij daj rún' naránj ruhua Yan'anj
nga si-sunj. ¹¹Hué dan ni nana'ui'
né' daj gatu né' rian naránj ruhua
Yan'anj. Ngaa ni si gui'yaj ni a 'ngo
né' daj rún' gui'yaj ni xi né' nun
dagahuin daj asij ná.

¹²Daj si hua ni'na' si-nuguan' Yan'anj. Ni nucuaj nuguan' daj. Ni daj rún' hua rianj 'ngo espada, ni hué daj hua rian si-nuguan' Yan'anj. Ni hua rianj daj nga daran' espada hua huij rian. Daj si ga'ue gatu sa' si-nuguan' Yan'anj chruhua niman né'. Ni daj rún' 'yaj 'ngo espada ngaa atu rian naran' dugüi' cúj rian nun laquinj, ni hué daj 'yaj si-nuguan' Yan'anj ngaa atu chruhua niman né'. Ni rugüi' si ani ruhua né' nga si huin ruhua né', 'yaj si-nuguan' Yan'anj nej. ¹³Ni a 'ngo ni rasun gui'yaj Yan'anj si ga'ue guixi hui rian man'an Yan'anj mánj. Daj si rugüi' sa' daran'anj rian Yan'anj. Ni rian Yan'anj huin si naga'ui' né' cuenta.

Jesús el gran sumo sacerdote

¹⁴Ni Jesús huin da'níj Yan'anj. Ni huin sij 'ngo chrej huin achij nin' ruhua. Ni nun xi'i sij xi'í né' rian Yan'anj. Ni hua guisíj sij da ni xata' nne sij. Xi'í daj ni ga nica ruhua né' nga si-nuguan' Yan'anj huin nuguan' nata' né' rian ni ngüi. ¹⁵Hué Jesús huin 'ngo chrej a'nin' xi'í né'. Sani ga'ue nani 'i ruhua sij ni'yaj sij né' ngaa na'ue xacaj sa' né' cuenta 'ngo chrej sa'. Daj si daj rún' atsij sichre niman né', ni hué daj gatsij sichre niman Jesús. Sani nitaj gaquin' gui'yaj sij mánj. ¹⁶Hué dan ni gahuin nichrun' né' rian Cristo huin tsínj huin chrej sa' daj. Ni si guiriun ruhua né' gan'anj né' rian nne Yan'anj mánj. Ngaa ni nahuin yaco ruhua Yan'anj ni'ya né'. Ni güi guiran' né' sayun, ni gui'yaj Yan'anj sinduj rian né'.

5 Ni ngaa nacui ni ngüi 'ngo tsínj gahuin 'ngo chrej a'nin',

ni gani ni sij sí' sisi guiniquin' sí' ga'mi sí' nga Yan'anj xi'í ni sij. Ni naga'ui' chrej daj ni rasun nga ni xucu dagahui' ni sij rian Yan'anj xi'í gaquin' da'ui ni sij. ²Ni ga'ue ga'mi nanaj chrej daj nga ni ngüi nun ni'i sa' nga ni ngüi ga ni'ya nej. Daj si achin gahuin sa' niman sij huin sij chrej. ³Ni xi'í si achin gahuin sa' niman sij, ni hua nian si naga'ui' sij xucu rian Yan'anj xi'í si-gaquin' man'an sij nga xi'í si-gaquin' ni ngüi nej.

⁴Ni a 'ngo tsínj si ga'ue gahuin chrej anin', gui'yaj man'an sij. Sani tsínj gaquinj Yan'anj, ni hué sij gahuin chrej daj rún' gaquinj Yan'anj tsínj gu'naj Aarón gahuin sí' chrej a'nin' asij ná. ⁵Ni sé man'an Cristo gani ruhua sisi gahuin sij 'ngo chrej a'nin'. Sani nacui man'an Yan'anj Cristo gahuin sí' chrej a'nin'. Ni gataj Yan'anj gunun sij:

Hué re' huin da'ni.

Yyaj ni gahuinj chréj re' aj. Hué daj gataj Yan'anj gunun Jesús.

⁶Ni gataj Yan'anj ango nuguan' gunun Jesús:

Niganj nin' gahuin re' chrej.

Ni daj rún' gahuin tsínj gu'naj Melquisedec chrej asij ná, ni hué daj gahuin man'an re' chrej nej.

Daj gataj Yan'anj gunun Cristo.

⁷Ngaa gane Cristo chruhua xungüi nan, ni gachínj jni'yaj sij ga'mi yaco sij rian Yan'anj. Ni ga'mi nucuaj sij gacój sij rian Yan'anj. Daj si Yan'anj ga'ue gui'yaj sisi si gahui' sij. Ni gunun sa' Yan'anj si-nuguan' Cristo xi'í si dagahuin sa' sij rian Yan'anj. ⁸Ni nunj si Cristo huin da'níj Yan'anj, sani gahuin chrun

sij dagahuin sij rian Yan'anj xi'í sayun guiran' sij ngaa gahui' sij. ⁹Ni ngaa guisíj gahuin sa' nin' Cristo, ni gahuin sij tsínj ganacaj niganj nin' daran' ni ngüi dagahuin rian sij. ¹⁰Ni gui'yaj Yan'anj sisi gahuin sij chrej a'nin' daj rún' gahuin Melquisedec chrej a'nin' asij ná.

Advertencia contra la apostasía

¹¹Xi'í nuguan' nan, ni hua nico nuguan' ga'ue ga'mi rian án re'. Sani 'i huaj ga'mi si na'ue gunun rá'yanj án re'. ¹²Ni rian guisíj ga'i yo' xuman ruhua á re' ni'yaj á re' Cristo, ni hua nian si gahuin ni é re' tsínj digyán rian ni ngüi. Daj si achin si gara da'nga' sa' ruhua ni é re' nuguan' gahuin chrún sini ni é re' rian si-nuguan' Yan'anj ruhua á re'. Xi'í daj ni daj rún' 'yaj ni lij, ni da'nga' daj 'yaj á re'. Daj si utsi lij xi'í si na'ue xaj chra. Ni na'ue gara da'nga' ruhua á re' nuguan' hua cu aj. ¹³Ni daran' tsínj achin gahuin chrún sa' si-nuguan' Yan'anj, ni 'yaj ni sij daj rún' 'yaj ni lij utsi to. Daj si achin gahuin chrún ni sij chrej nica digyán Yan'anj rian ni sij. ¹⁴Sani ni tsínj huin chrún sa' si-nuguan' Yan'anj, ni ya'yoj 'yaj ni sij daj rún' 'yaj ni tsínj a'ue xa chra. Daj si gu'yun ni sij guini'i ni sij daj hua nuguan' sa' nga nuguan' nitaj si hua sa'.

6 Hué dan ni si gani ruhua né' digui'yun ruhua' yún né' nuguan' gahuin chrún sini né' xi'í Cristo. Sani digui'yun né' ango nuguan' achij doj xi'í Cristo huin nuguan' gui'yaj sisi guinico' sa' né' Cristo. Ni sé si hua nian ga'mi né' ya'yoj xi'í si ganani ruhua né' xi'í

gaquin' gui'yaj né' ngaa nun gahuin guini'i né' Yan'anj mánj. Ni si ga'mi né' ya'yoj xi'í si daj guxuman ruhua né' ni'yaj né' Yan'anj mánj. ²Ni si ga'mi né' ya'yoj xi'í si gata' nnee né'. Ni sé ya'yoj ga'mi né' xi'í si guta' né' ra'a né' rian ni jnánj né'. Ni si ga'mi né' ya'yoj xi'í si gana'nij ni níman. Ni si ga'mi né' ya'yoj xi'í si gahuin niganj ni ngüi castigo, gui'yaj Yan'anj mánj. Daj si hua gahuin chrún né' nuguan' nan. ³Ni sisi riqui Yan'anj, ni hué daj gui'yaj né' digui'yun né' ango nuguan' nico doj.

⁴Daj si sisi hua guixiguin chruhua niman né', gui'yaj Yan'anj, sisi garan' ruhua né' nuguan' sa' digyán Yan'anj rian né', sisi guinicaj dugüi' né' nga Espíritu Santo, ⁵ni sisi hua xacaj né' cuenta sisi hua sa' si-nuguan' Yan'anj, sisi hua ni'i né' daj nagui'yaj sa' Yan'anj xungüi ga'na', ⁶ngaa ni sisi 'ngo duna né' si-chrej Yan'anj, ni si ga'ue nanicaj ruhua né' nanico' né' Yan'anj ga mánj. Daj rún' huaj sisi ganico' ruhua' yún da'níj Yan'anj rian rugutsi, gui'yaj né'. Ni gui'yaj ducu ni ngüi rian da'níj Yan'anj, gui'yaj né' nej.

⁷Ni gui'yó' cuenta daj 'yaj yo'ój. Ni sisi nico' huaj aman', ni xira' cuej xa ni tsínj anáj xina. Ni gahui sa' yo'ój daj, gui'yaj Yan'anj. Ni daj rún' 'yaj yo'ój sa' daj, ni hué daj 'yaj niman tsínj xuman sa' ruhua ni'yaj Yan'anj. Ni gahui sa' sij, gui'yaj Yan'anj. ⁸Sani sisi xira' coj tanj nga coj ni'yo, ni sé yo'ój sa' huin, ataj ni sij. Ni a'mi quij ni sij xi'í yo'ój daj. Ni gaca yo'ój daj, si nitaj si 'yaj sa', ataj ni sij.

⁹Ni 'i ruhuaj ni'lyá á re' huin ín re' jnān nga xica'ui. Ni nunj

si a'mī nuguan' nucuaj rian án re', sanī hua gahuin yya ruhuāj sisi guī'yaj sa' á re'. Nī gahui sa' á re', guī'yaj Yan'anj anj. ¹⁰Daj si nīca 'yaj Yan'anj. Nī sé si 'yaj quij Yan'anj mánj. Nī nitaj ni'yun ruhua Yan'anj si guī'yaj sun sa' á re'. Daj si guī'yaj sa' á re' rian ni ngüi hua sa' rian Yan'anj. Nī hua gue 'yaj ni é re' sinduj nga ni sij xi'í si 'lī ruhua á re' ni'yaj á re' Yan'anj. ¹¹Nī huin ruhuāj sisi daj rún' 'yaj sa' ni é re', nī hué daj ga gue guī'yaj daran' ni é re' da' güi ganahuij xungüi. Nī gahuin yya ruhua á re' sisi guī'yaj sa' Yan'anj nga á re' aj. ¹²Xi'í daj nī si gahuin rumi' a ni é re' mánj. Sanī gache a ni é re' si-chrej ni tsínj xuman sa' ruhua ni'yaj Yan'anj. Nī ga'nin' ruhua ni sij nga sayun guiran' ni sij. Nī 'ngo nico' ni sij Yan'anj. Xi'í daj nī nahuin ra'a ni sij ni rasun sa' gataj yya Yan'anj gunun ni sij huin ni rasun nahuin ra'a ni ngüi nico' Yan'anj daj rún' gataj yya Yan'anj gunun né'.

¹³Nī ngaa guī'yaj yya Yan'anj 'ngo nuguan' nga tsínj gu'naj Abraham asij ná, nī guta' nīca yya man'an Yan'anj nga si-xugüi rian Abraham. Daj si nitaj si-xugüi ango tsínj huin achij daj nga man'an Yan'anj mánj. ¹⁴Nī gataj Yan'anj gunun Abraham: “Xanga' yya nī guī'yā sinduj rián re'. Nī guī'xi'nanj ni da'níj re'. Nī gahuin nico ni sij, guī'yā.” Daj gataj Yan'anj gunun Abraham.

¹⁵Ngaa ni nun gahuin ruhua Abraham mánj. Nī gana'uij sa' sij sisi gahuin daj rún' gataj Yan'anj gunun sij. Nī hua yya ga'nga da'níj sij. ¹⁶Nī ngaa uta' nīca yya tsínj daj rian dugüi' ni sij, nī a'mi ni

sij si-xugüi 'ngo rasun hua achij daj nga man'an ni sij. Nī ngaa uta' nīca yya ni sij rian dugüi' ni sij, ngaa nī ganiquin' si unun' ni sij, guī'yaj nuguan' daj. ¹⁷Nī huin ruhua Yan'anj digyanj rian ni dugüi' Abraham sisi si naduna si-nuguan' man'an Yan'anj. Xi'í daj nī digyán Yan'anj, nī guta' nīca yya ra'a sisi xanga' si-nuguan'anj. ¹⁸Ngaa nī guisíj huíj nuguan' ga'mi Yan'anj. Nī nitaj aman naduna Yan'anj nuguan' ga'mi mánj. Nī xi'í si xanga' si-nuguan' Yan'anj, nī hua nīca ruhua né', 'yaj nuguan' daj. Nī gahuin yya ruhua né' sisi yya gahui sa' né' daj rún' gataj Yan'anj gunun né'. ¹⁹Nī sisi 'ngo gahuin yya ruhua né', nī hua nīca ruhua né', ngaa nī si guxu'ui' niman né' xi'í si xanga' nuguan' guxuman ruhua né'. Nī xi'í nuguan' sa' daj ga'tue gan'anj gane né' rian nne man'an Yan'anj. ²⁰Nī hua gatúj sini Jesús yu'uj daj. Ngaa nī ga'níj sij chrej ga'tue gan'anj né' rian nne man'an Yan'anj. Nī nīganj gahuin Jesús chrej a'nin' xi'í né' daj rún' gahuin tsínj gu'naj Melquisedec asij ná.

El sacerdocio de Melquisedec

7 Nī tsínj gu'naj Melquisedec gahuin rey gane sij xuman' gu'naj Salem asij ná. Nī gahuin sij chrej gunánj guitsi rian Yan'anj achij nne xata'. Nī ngaa nanicaj Abraham 'na' niqui sij ngaa guī'yaj gana sij gunun' sij nga ni rey, nī nacaj dugüi' Melquisedec nga sij. Nī gataj Melquisedec sisi guī'yaj Yan'anj sinduj rian Abraham, ruhua sij. ²Nī gaya Abraham daj nico guī'yaj gana sij rian ni rey daj. Nī

ngaa guisij ichi' rasun, ni ga'ui' sij 'ngo rasun daj rian Melquisedec. Ni hué daj gui'yaj Abraham da' ganahuij gaya sij ni rasun gui'yaj gana sij. Ni si-xugüi Melquisedec huin ruhuaj gata sisi "Rey 'yaj nica" huin sij. Ni gahuin sij "Rey rian xuman' Salem". Ni huin ruhuaj gata sisi gahuin din'inj ruhua ni ngüi 'yaj rey daj. ³Ni nitaj chrej Melquisedec nga nni sij manj. Ni nitaj dugüi' sij rian ga'nga sij. Ni nitaj güi gahui' sij nej. Ni daj rún' huin da'nij Yan'anj, ni hué daj huin Melquisedec nej. Ni niganj nin' gahuin sij chrej.

⁴Hué dan ni xacaj né' cuenta daj huin rian nico Melquisedec. Daj si man'an xi né' Abraham ga'ui' 'ngo rasun rian ichi' gui'yaj gana sij rian ni rey daj, ga'ui' sij rian Melquisedec. ⁵Ni gui'yaj Yan'anj sisi go'ngo ni da'ni si'ni xi né' tsínj gu'naj Leví gahuin chrej xi'í ni ngüi israelita. Ni a'nin' si-ley Moisés sun sisi hua nian ga'ne ni sij 'ngo rasun rian ichi' daj rian daran' ni tsínj israelita. Ni huin ni sij dugüi' ni tsínj israelita. Daj si daran' ni sij huin da'ni si'ni Abraham.

⁶Sani sé da'nij Leví huin Melquisedec. Sani nacaj sij 'ngo rasun rian ichi' rasun, gui'yaj Abraham. Ni gataj Melquisedec sisi gui'yaj Yan'anj sinduj rian Abraham huin sí' tsínj rian hua gataj yya Yan'anj sisi gahui sa' sí', gui'yaj Yan'anj. ⁷Ni ni'i daran' né' sisi huin achij tsínj a'mi nuguan' sa' sisi gui'yaj Yan'anj sinduj rian dugüi' sij daj nga tsínj unun nuguan' sa' daj. ⁸Ni xungüi man né' nan, ni a'ui' ni sij 'ngo rasun xi'nej rian ichi'

rian ni tsínj huin ni sí' ni da'ni si'ni Leví. Ni hua 'ngo güi, ni gahui' ni sí'. Sani ataj si-nuguan' Yan'anj sisi niganj hua ni'na' xi' Melquisedec. ⁹Ni ga'ue gataj né' sisi ngaa ga'ui' Abraham 'ngo rasun xi'nej rian ichi' rian xi' gu'naj Melquisedec, ni naru'ue nuguan'an Leví nga Abraham rian Melquisedec. Ni a'nej ni da'ni si'ni Leví rasun daj rian ni ngüi. ¹⁰Ni ga'ue gataj né' daj xi'í si ngaa gahui Melquisedec nacaj dugüi' sij nga Abraham, ni hua guini'i Yan'anj sisi ga'nga Leví rian Abraham.

¹¹Ni huin ni sij ni da'ni si'ni Aarón. Ni sisi ga'ue gahuin sa' nin' ni tsínj israelita, gui'yaj ni da'ni si'ni Leví, (daj si nahuin ra'a ni tsínj israelita si-ley Yan'anj rian ni da'ni si'ni tsínj gu'naj Leví) ni nitaj si ní'yanj si ga'na' ango chrej daj rún' huin Melquisedec. Sani nun guisij gahuin sa' ni tsínj israelita, gui'yaj ni tsínj levita manj. Ni sé dugüi' Aarón huin chrej naca daj. ¹²Daj si ngaa naduna Yan'anj ni chrej, ni hua nian si naduna ley nej. ¹³Ni chrej naca daj, ni nico' sij ango xi'nin' ni tsínj israelita. Ni a 'ngo ni tsínj huin xi'nin' daj nun gahuin chrej guiniquin' rian altar manj.

¹⁴Daj si ni'i daran' né' sisi ga'na' Señor nicaj sun rian né' rian xi sí' huin tsínj gu'naj Judá. Ni nun gataj Moisés sisi ni tsínj nico' xi'nin' daj gahui chrej manj. ¹⁵Hué dan ni ga'ue guini'i xanga' né' sisi naduna Yan'anj ni chrej daj. Daj si yyaj ni huin Cristo chrej naca daj rún' gahuin Melquisedec asij ná. ¹⁶Ni nitaj 'ngo ley gui'yaj, ni gahuin Cristo 'ngo chrej. Daj si gataj ley daj

un xi'nin' ga'na' ni chrej. Ni nitaj si ga'na' Cristo xi'nin' da mánj. Sani Cristo huin chrej xi'í si gahuin nucuaj sij ga ni'na' niganj sij aj. ¹⁷Daj si gataj si-nuguan' Yan'anj xi'í Cristo:

Hué re' huin chrej gane niganj.
Ni daj rún' gahuin Melquisedec chrej asij ná, ni hué daj huín re' nej.

Hué daj gataj si-nuguan' Yan'anj xi'í Cristo.

¹⁸Hué dan ni xi'í ley dagahuin ni sij asij ná, sani yyaj ni gahuin nini né' rian ley daj. Daj si ninaj ga'mi ley daj. Ni nitaj si ní'yan ga mánj.

¹⁹(Ni a 'ngo ni tsínj nun guisij gahuin sa', gui'yaj si-ley Moisés mánj). Ngaa ni yyaj ni ana'uij né' sisi gui'yaj Yan'anj ango nuguan' sa' nga né'. Xi'í daj ni huaj né' gahuin nichrun' né' rian Yan'anj.

²⁰Ni ngaa gataj Yan'anj sisi Cristo gahuin chrej naca daj, ni guta' nica yya Yan'anj sisi nuguan' xanga' huin. ²¹Sani nun guta' nica Yan'anj rian ni da'níj si'ni Leví asij ná ngaa gax'i'ni ni sij gahuin ni sij chrej. Sani gataj Yan'anj nuguan' nan rian Cristo:

Guta' nica Señor.

Ni si naduna si-nuguan' sij:
“Niganj gahuín re' chrej daj rún' gahuin Melquisedec asij ná.”

Daj gataj Yan'anj gunun Cristo.

²²Hué dan ni xi'í Jesucristo, ni guini'i yya né' sisi hua sa' doj nuguan' nan daj nga nuguan' gui'yaj yya Yan'anj nga ni ngüi guimán asij ná. ²³Ni xi'í si nun ga'ue gane niganj ni chrej guimán asij ná, gui'yaj si ahui' ni sij, xi'í daj ni gahuin nico tsínj gahuin chrej.

²⁴Sani Jesús huin 'ngo chrej gane niganj. Xi'í daj urin sij huin chrej rian Yan'anj xi'í né'. Ni a 'ngo tsínj si ga'ue natu rian sij mánj. ²⁵Hué dan ni 'ngo hua ni'na' Jesús. Xi'í daj ni ga'ue ganacaj niganj nin' Jesús daran' né' ngaa gahuin nichrun' né' rian Yan'anj xi'í man'an sij. Daj si niganj achínj jni'yaj Jesús rian Yan'anj xi'í né'.

²⁶Hué gue Jesús huin chrej huin achij ní'yanj né'. Daj si hué sij huin tsínj sa' nin' ruhua. Ni nitaj gaquin' da'ui sij mánj. Ni nitaj si hua quij niman sij. Ni gahuin nini sij rian ni tsínj 'yaj gaquin'. Ni nne sa' nin' sij xata' rian nne man'an Yan'anj xanga'. ²⁷Ni sé daj rún' gahuin ni chrej a'nin' guimán asij ná huin Jesús mánj. Daj si ya'yoj dagahui' sini ni sij xucu naga'ui' ni sij rian Yan'anj xi'í si-gaquin' man'an ni sij. Asíj ni dagahui' ni sij xucu xi'í si-gaquin' ango ni ngüi. Sani sé daj huin nga Jesús mánj. Daj si ngaa naga'ui' sij man'an sij xi'í né', ni urin yun naránj sij rian si-gaquin' né'. ²⁸Ni si-ley Moisés 'yaj sisi guinica' sun ni tsínj achin gahuin sa' gahuin ni sij chrej a'nin'. Sani da' síj ga'ui' Yan'anj ley daj, ni guta' nica yya Yan'anj ango nuguan' naca. Ni da'níj Yan'anj gahuin nuguan' naca daj. Ni hua sa' nin' Jesús. Ni gane niganj sij nej.

El mediador de un nuevo pacto

8 Hué dan ni nuguan' huin rian scanij ni nuguan' a'mi rian án re' huin nuguan' xi'í chrej a'nin' niquin' rian Yan'anj xi'í né'. Ni nne sij ne' chrej ra'a sa' Yan'anj nucuaj nne xata'. ²Ni hué Jesús unánj

guitsi rian Yan'anj chruhua nuhui nne xata'. N_i hué nuhui daj huin nuhui xanga', gui'yaj man'an Señor. N_i sé ni tsínj man chruhua xungüi nan gui'yaj mánj. ³N_i niquin' daran' chrej a'nin' naga'ui' ni sij ni rasun nga ni xucu gaca rian Yan'anj. Xi'í daj n_i hua nian si guinicaj Jesús si naga'ui' sij rian Yan'anj nej. ⁴N_i sisi nne Jesús chruhua xungüi nan, n_i si gahuin sij chrej mánj. Daj si man ni chrej naga'ui' ni rasun rian Yan'anj daj rún' a'nin' si-ley Moisés sun. ⁵San_i unánj guitsi ni chrej daj rian Yan'anj nga rasun man chruhua xungüi nan. N_i ni rasun daj huin 'ngo da'nga' si mán xata'. As_i daj rún' huin si-gaxun' ni rasun mán xata' huin ni rasun da nej. Daj si ngaa gaxi'i Moisés gui'yaj sij ducua Yan'anj, n_i gataj Yan'anj gunun sij: “Ga cuidado_o re' sisi gui'yáj re' daran'anj daj rún' digyānj rián re' ngaa gané re' chra quij daj.” Daj gataj Yan'anj gunun Moisés. ⁶San_i yyaj n_i niquin' Jesús unánj guitsi sij rian Yan'anj. N_i hua sa' doj si-sun sij daj nga si-sun ni chrej guimán asij ná. N_i daj rún' hua sa' doj si-sun Jesús daj nga si-sun ni chrej daj, n_i hué daj hua sa' nuguan' naca riqui Yan'anj rian né' daj nga si-ley Moisés. N_i hua sa' doj nuguan' gataj yya Yan'anj rian né' yyaj rian nuguan' ga'mi sini Yan'anj anj. ⁷N_i sisi ga sa' n_in' nuguan' gui'yaj yya sini Yan'anj nga ni tsínj israelita, n_i nitaj si huaj sisi gui'yaj yya ruhua' yún Yan'anj nga né' mánj. San_i hua yya gui'yaj yya ruhua' yún Yan'anj nga né'. ⁸Hué dan n_i ga'mi Yan'anj gaquin' rian

ni ngüi guimán asij ná. N_i gataj Yan'anj:

Hua 'ngo güi, n_i gui'yaj yyā angó nuguan' naca nga ni dugüi' tsínj gu'naj Israel nga ni dugüi' tsínj gu'naj Judá, ataj man'an Señor.

⁹N_i sé daj rún' gui'yaj yyā nga ni xi ni sij huin ni tsínj guimán asij ná, n_i sé daj gui'yaj yya ruhua' yūnj nga ni sij mánj. N_i asij ná ngaa guimán ni sij yu'uj gu'naj Egipto, n_i guida'a ra'a ni sij, n_i guirij gan'anj ni sij.

San_i rian nun dagahuin ni sij nuguan' gui'yaj yyā nga ni sij, n_i gahuin anē rian ni sij, ataj man'an Señor.

¹⁰Hué dan n_i nan huin nuguan' naca gui'yaj yyā nga ni dugüi' Israel xiráj ga'i yo', ataj man'an Señor.

Gui'yā sisi gunun si-nuguan'anj chruhua niman ni sij.

N_i garūnj nuguan' daj chruhua niman ni sij nej.

N_i gahuin Dan'anj ni sij man'anj.

N_i gahuin ni sij ni tsínj guinico' man'anj.

¹¹N_i güi daj n_i nitaj si hua nian sisi gataj ni sij rian dugüi' ni sij nga jnánj ni sij:

“Guini'í re' Señor.”

Sé daj gataj ni sij mánj.

Daj si guini'í daran' ni sij man'anj.

N_i asij ni tsínj hua lij nga ni tsínj achij, n_i guini'í daran' ni sij man'anj.

¹²N_i guinicā 'ngo niman nico rian si quij gui'yaj ni sij.

Ni nitaj aman nanun ruhuāj
guini'inj si-gaquin' ni sij mánj.
Daj gataj Yan'anj gunun ni ngüi
guimán asij ná.

¹³Ni ngaa a'mi Yan'anj xi'í nuguan'
naca gui'yaj yya nga né', ni huin
ruhuaj gata sisi nuguan' hua gachin
huin nuguan' gui'yaj yya sini
Yan'anj nga ni ngüi guimán asij ná.
Doj hua ni 'ngo ganahuij nuguan'
daj.

9 Ni ngaa gui'yaj yya sini
Yan'anj nga ni tsínj israelita,
ni gataj snan'anj Yan'anj daj gui'yaj
ni sij ngaa nahuin yu' ni sij guinico'
ni sij Yan'anj. Ni gataj snan'anj
Yan'anj daj ga nuhui gui'yaj ni sij
chruhua xungüi nan. ²Ni nuhui
daj huin 'ngo nuhui atsij, gui'yaj
ni sij. Ni ne' rian chruhua nuhui
niquin' 'ngo candelero nga mesa
taj si-chrachrunj Yan'anj. Ni yu'uj
daj gu'naj rian hua sa'. ³Ni ne'
rucu ango atsij nico' chruhua
nuhui daj gu'naj rian hua sa' nin'.
⁴Ni chruhua hue' daj niquin' 'ngo
gaga' oro rian utin' ni sij siqufj.
Ni ngaj si-chrúnj Yan'anj chrúnj
gue' daj. Ni da' ganicaj oro xiráj
chrúnj daj nga. Ni chruhua chrúnj
daj nun 'ngo siu huin gaga' oro.
Ni chruhua siu daj nun si gu'naj
maná. Ni chruhua chrúnj daj, ni
nun chrun ni'í guinicaj tsínj gu'naj
Aarón. Ni naxi'nanj da'níj chrun
ni'í daj asij ná. Ni nun huij yej gara'
chruhua daj. Ni rian huij yej daj
garun Yan'anj ni nuguan' gui'yaj
yya Yan'anj nga ni ngüi. ⁵Ni niquin'
huij gaga' huin ángel gu'naj-á'
querubines xiráj chrúnj daj. Ni
nungüej ángel daj huin 'ngo da'nga'
digyán sisi nne Yan'anj yu'uj daj. Ni

hua ránj si-gachi nungüej ángel daj
rian gayanj ni sij si-tun xucu aránj
rian si-gaquin' ni ngüi. Sani yyaj
ni sé si hua nian sisi ga'mi xe'ej xi'í
go'ngo ni rasun daj mánj.

⁶Ni ngaa hue' daj gui'yaj xugüi
ni sij ni rasun daj, ni ya'yoj atuj
ni chrej chruhua hue' ne' rian daj
sisi gui'yaj sun ni sij si-sun Yan'anj.
⁷Sani chruhua ango hue', ni atuj
urin chrej a'nin'. Ni urin yun atuj
sij da nasíj yo'. Ni ngaa atuj sij, ni
nicaj sij si-tun xucu sisi ga'ui' sij
xi'í si-gaquin' man'an sij nga xi'í
si-gaquin' ni ngüi huin gaquin' nun
ni'i ni ngüi si gui'yaj ni sij. ⁸Hué
ducuanj daj, ni digyán Espíritu
Santo sisi ngaa hua gue nne hue' ne'
rian daj, ni achin si gahuin ní'nij
chrej gatu ni ngüi chruhua ango
hue' nne ne' chruhua huin rian hua
sa' daj. ⁹Hué ni nuguan' nan huin
'ngo chrej digyán Yan'anj rian né'
man yyaj. Daj si naga'ui' ni chrej ni
rasun nga ni xucu gaca rian Yan'anj.
Sani na'ue gahuin sa' niman ni ngüi
rian Yan'anj, gui'yaj ni rasun nga ni
xucu gaca naga'ui' ni chrej daj mánj.
¹⁰Maan si a'mi ni nuguan' nan xi'í
si xa né', si go'o né', ni daj gui'yaj
né' nanía' né'. Ni urin güenda nnee
cúj né' a'nin' ni nuguan' nan sun. Ni
ní'yanj ni nuguan' nan da nagui'yaj
naca Yan'anj ni nuguan'.
¹¹Sani hua ga'na' Cristo. Ni hué
sij huin chrej a'nin' rian ni nuguan'
naca daj. Ni gatúj sij chruhua nuhui
sa'. Ni hua sa' daj, daj nga nuhui
nne chruhua xungüi nan. Ni sé ra'a
ni tsínj gui'yaj nuhui gatúj Jesús
daj mánj. Daj si sé 'ngo nuhui nne
chruhua xungüi nan huin mánj.
¹²Ni sé tun stanē nga tun cero

nicaĵ Cristo gatúj sij chruhua nuhui daj. Sanĭ urin yun gatúj sij rian hua sa' nin' daj nga si-tun man'an sij. Ni hué ducuánĵ daj gui'yaj sij si ganacaj sij nĭganĵ nin' né'. ¹³Ni dagaman' ni chrej si-tun sicuj nga si-tun stane rian nnee cúĵ ni ngüi nitaj si hua sa' nnee cúĵ. Ni hué daj gari yan'an ni sij cero rian nna daj. Ni dagaman' ni sij yaj cero daj rian nnee cúĵ ni ngüi daj. Ni gahuin sa' nnee cúĵ ni sij rian Yan'anĵ, gui'yaj tun xucu nga yaj cero. ¹⁴Ni sisi gahuin sa' nnee cúĵ ni ngüi gui'yaj si-tun xucu, ni sa' doj gui'yaj si-tun man'an Cristo na'nin'-ín' niman né'. Daj si xi'í Espĭritu Santo nne nĭganĵ, ni naga'ui' Cristo man'an sij rian Yan'anĵ. Ni nitaj 'ngo gaquin' da'ui sij máĵ. Ni na'nin' si-tun man'an Cristo niman né' xi'í si-quij gui'yaj né'. Ngaa ni ga'ue dagahuin né' rian Yan'anĵ hua ni'na'.

¹⁵Ngaa ni ga'na' Jesucristo gahui' sij xi'í si-gaquin' né'. Daj si gui'yaj né' gaquin' nun dagahuin né' nuguan' gui'yaj yya Yan'anĵ nga ni ngüi guimán asij ná. Yyaj ni niquin' Jesús a'mi sij 'ngo nuguan' naĉa rian né' daj gui'yaj né' gahuin sa' né' rian Yan'anĵ. Xi'í daj ni ga'ue nahuin ra'a nĭganĵ né' ni rasun sa' mán xata', gui'yaj Cristo huin né' ni ngüi gaquinĵ Yan'anĵ. Daj si hué daj gataĵ yya Yan'anĵ gunun né'. ¹⁶Ni naxi nicaĵ 'ngo tsínĵ daj 'ngo yanĵ ata sisi daj huin ruhua sij si gura' da'aj ni dugüi' sij si'yaj sij ngaa gahui' sij. Sanĭ si ga'ue gura' da'aj ni dugüi' sij si'yaj sij ngaa nun gahuin gahui' sij máĵ. ¹⁷Daj si si ga'ue gui'yaj ni sij rún' ataj ata daj ngaa hua ni'na' sij nne sij.

Sanĭ ngaa gahui' tsínĵ daj, ni ga'ue gui'yaj ni sij daj rún' ataj ata daj. ¹⁸Ni ngaa gui'yaj yya sini Yan'anĵ 'ngo nuguan' nga ni ngüi guimán asij ná, ni hua nĭan si gayanj si-tun xucu xi'í gaquin' da'ui ni sij. ¹⁹Ni ngaa guisĭĵ ga'mi Moisés daran' ni nuguan' huin si-ley Yan'anĵ rian daran' ni ngüi, ni guida'a sij si-tun cero nga si-tun stane nacheĵ sij nnee. Ni guida'a sij to xachij mare nga ra'a coĵ gu'naj hisopo nej. Ni dagaman' sij tun daj rian libro huin si-ley Yan'anĵ nga rian daran' ni ngüi nej. ²⁰Ni gataĵ snan'anĵ Moisés rian ni ngüi: “Tun nan huin tun gayanj xi'í nuguan' gui'yaj yya Yan'anĵ nga né'. Ni a'nin' Yan'anĵ sun sisi dagahuin né' nuguan' daj.” Daj gataĵ Moisés rian ni ngüi.

²¹Ni hué daj dagaman' Moisés tun daj nuhui atsij nga rian ni rasun aráj sun ni sij chruhua nuhui ngaa gui'yaj sun ni sij si-sun Yan'anĵ. ²²Ni nico ni rasun nahuin sa' rian Yan'anĵ gui'yaj si-tun xucu ataj si-ley Moisés. Ni sisi nitaj tun gayanj, ni si guinicaĵ Yan'anĵ niman nico nga si-gaquin' ni ngüi máĵ.

El sacrificio de Cristo quita el pecado

²³Ni asij ná ni hua nĭan sisi gahuin sa' ni rasun garasun ni chrej nga si-tun xucu. Ni rasun daj huin 'ngo da'nga' daj rún' huin ni rasun mán xata'. Sanĭ ni rasun mán xata' si ga'ue gahuin sa' ni rasun daj, gui'yaj si-tun xucu máĵ. Urin si-tun man'an Cristo ga'ue gui'yaj sisi gahuin sa' ni rasun daj. ²⁴Daj si nun gatu Cristo chruhua nuhui gui'yaj ni tsínĵ. Daj si nuhui gui'yaj ni sij asij ná huin 'ngo da'nga' daj rún'

huin nuhui mán xata'. Saní gatúj Cristo chruhua nuhui mán xata'. Ní yyaj niquin' sij achínj jni'yaj sij rian Yan'anj xi'í né'. ²⁵Ní nun gatu Cristo chruhua nuhui nne xata' sisi nico' huaj naga'ui' sij man'an sij rian Yan'anj daj rún' gatúj chrej a'nin' urin nasíj yo' asij ná. Ní nicaj chrej daj si-tun xucu huaj sij. Saní sé si-tun man'an sij nicaj sij gatúj sij rian hua sa' nín' ruhua mánj. ²⁶Sisi hué daj gui'yaj Jesús, ní hua nian sisi nico' huaj guíran' sij sayun asij ngaa guerenga' xungüi. Saní yyaj ruhua ganahuij xungüi, ní ga'na' Cristo. Ní urin yun naga'ui' sij man'an sij rian Yan'anj sisi ga'ne sij si-gaquin' né'.

²⁷Ní ni'í né' sisi urin yun gahui' daran' né' huin né' ni ngüi man chruhua xungüi nan. Hué dan ní da rucu, ni guíniquin' né' rian Yan'anj. Ní nagui'yaj yya Yan'anj xi'í si-gaquin' né'. ²⁸Hué ducuánj daj, ní urin yun naga'ui' Cristo man'an sij gahui' sij xi'í si-gaquin' nico ni ngüi. Ní ngaa ga'na' ruhua' yún sij, ní sé si ga'na' gahui' sij xi'í si-gaquin' ni ngüi mánj. Saní ga'na' Cristo sisi nacaj sij ni ngüi ana'uij sisi ga'na' sij.

10 Ní si-ley Moisés huin 'ngo da'nga' digyán daj hua si sa' gui'yaj Yan'anj da ne' rucu rian né'. Ní sé daj rún' hua si-ley Moisés hua si sa' da mánj. Asij ná ní yoyo' huaj ni sij rian Yan'anj naga'ui' ni sij xucu xi'í si-gaquin' ni sij. Saní nitaj aman ga'ue gahuin sa' niman ni sij rian Yan'anj, gui'yaj ley da mánj. ²Ní sisi ga'ue gahuin sa' niman ni sij xi'í si naga'ui' ni sij xucu rian Yan'anj, ngaa ní si dagahui' ni sij

xucu rian Yan'anj ga mánj. Daj si 'ngo gahuin sa' ni sij xi'í si gui'yaj ni sij. Ní nitaj si gahuin ruhua ni sij nga si-gaquin' ni sij mánj. ³Saní yoyo' ngaa dagahui' ni sij xucu, ní nanun ruhua ni sij sisi da'ui ni sij gaquin'. ⁴Daj si si ga'ue ga'ne si-tun sicuj nga si-tun stane si-gaquin' ni ngüi mánj. ⁵Xi'í daj ní ngaa gatúj Cristo chruhua xungüi nan, ní gataj sij gunun Yan'anj:

Na'uej ruhua re' sisi dagahuij xucu rian re'.

Ní na'uej ruhua re' sisi riquij rasun rián re'.

Saní gui'yaj xugüi re' nnee cü xi'ij.

⁶Ní nun aran' ruhua re' ni'yáj re' xucu aca nga xucu gahui' xi'í gaquin' mánj.

⁷Ngaa ni gatā gunún re':

“Huēj 'na' rián re' gui'yā si aran' ruhua re' huín re' Yan'anj.

Daj si hué daj garun ni sij xi'ij chruhua libro daj asij ná.”

Daj gataj Cristo gunun Yan'anj.

⁸Ní hua sini gataj Cristo gunun Yan'anj: “Nun aran' ruhua re' ni'yáj re' ni xucu dagahui' ni ngüi rián re' nga ni rasun a'ui' ni sij rián re' nej, xucu ahui' sisi xi'ne si-gaquin' ni sij nej. Nun huin ruhua re' sisi hué daj gui'yaj ni ngüi mánj.” Daj gataj Cristo. (Ní a'ui' ni sij ni rasun daj daj rún' gataj si-ley Moisés.)

⁹Ngaa ní gataj ruhua' yún Cristo: “Huēj 'na' rián re' gui'yā si aran' ruhua re' huín re' Yan'anj.” Daj gataj sij.

Ní huin ruhuaj gata sisi ga'ne Cristo ducuánj nicaj sini ni sij. Ní nagui'yaj Cristo ango ducuánj naca huin si-nuguan' man'an sij.

¹⁰Ngaa n̄i gahuin sa' niman né' rian Yan'anj, 'yaj si dagahuin Jesús si garan' ruhua Yan'anj. Daj si urin yun naga'ui' sij man'an sij gahuí' sij niganj n̄in' xi'í si-gaquin' né'.

¹¹Xanga' n̄i ya'yoj niquin' daran' ni chrej 'yaj sun ni sij rian Yan'anj. N̄i naga'ui' ni sij xucu rian Yan'anj. Sani nitaj aman ga'ue xi'ne si-gaquin' ni ngüi, gui'yaj ni xucu naga'ui' ni sij da mánj. ¹²Sani urin yun naga'ui' Cristo man'an sij rian Yan'anj gahuí' sij urin niganj n̄in' xi'í si-gaquin' ni ngüi. Ngaa n̄i gan'anj gane sij ne' chrej ra'a sa' man'an Yan'anj. ¹³N̄i yyaj n̄i ana'uij sij sisi guta' sij dacój sij rian ni tsínj unun' nga sij, gui'yaj Yan'anj. ¹⁴Urin yun naga'ui' Cristo man'an sij rian Yan'anj. Xi'í daj n̄i niganj n̄in' gahuin sa' niman ni ngüi hua sa' rian Yan'anj. ¹⁵N̄i hué daj ga'mi xanga' Espíritu Santo asij ná. Hua sini gataj-á':

¹⁶Ngaa gachin ni güi daj, n̄i hué nan huin nuguan' gui'yaj yyaj nga ni sij.

Gui'yā sisi guinun si-lēy niman ni sij.

N̄i garūnj ley daj chruhua niman ni sij nej.

Daj gataj Espíritu Santo.

¹⁷Ngaa ni gataj ruhua' yún sij:

N̄i nitaj aman nanun ruhuaj ni'inj si-gaquin' ni sij nga ni rasun quíj, gui'yaj ni sij mánj.

Daj gataj Espíritu Santo.

¹⁸Hué dan n̄i xi'í si guinicaj Yan'anj 'ngo niman nico rian si-gaquin' né', n̄i nitaj si ní'yanj sisi naga'ui' né' rasun rian Yan'anj xi'í si-gaquin' né' ga mánj.

¹⁹Hué dan n̄i xi'í si-tun man'an Jesucristo, n̄i nitaj si guxu'ui' né'

gatu né' rian hua sa' n̄in' daj huin ducua' Yan'anj huin ín re' jnān nga xica'ui. ²⁰N̄i ga'n̄j Cristo 'ngo chrej naca gache' xi'í si gahuí' nnee cúj sij. N̄i xi'í daj n̄i ga'ue gatu né' rucu atsij nico' chruhua ducua' Yan'anj. N̄i chrej naca daj huin nnee cúj man'an sij. ²¹N̄i hua 'ngo chrej huin achij n̄in' niquin' sij rian Yan'anj xi'í né' huin sij Jesucristo. ²²Xi'í daj n̄i gan'anj nichí né' rian Yan'anj. N̄i xi'í si xuman ruhua né' ni'yaj né' Jesús, n̄i gahuin yya ruhua né' sisi ga'ue guinico' sa' né' Yan'anj. N̄i si ganani ruhua né' xi'í gaquin' da'ui né'. Daj si na'nin' Yan'anj si-tun man'an Jesús chruhua niman né'. N̄i nahuin sa' nnee cúj né' xi'í si gata' nnee né' chruhua nnee sa'.

²³N̄i 'ngo ga nica ruhua né'. N̄i si gahuin huíj ruhua né' nga nuguan' sa' gui'yaj Yan'anj nga né' huin nuguan' nata' né' rian ni ngüi. Daj si dagahuin Yan'anj nuguan' gui'yaj yya nga né'. ²⁴N̄i nano' né' ducuanj daj ga'ue gahuin 'i ruhua go'ngo' guini'f' ni dugüí'. N̄i hué daj gui'yaj né' sisi gui'yaj sa' go'ngo' rian ni dugüí'. ²⁵N̄i si duna né' si nahuin yu' né' nga ni dugüi' né', si hua ngüi nitaj si nico' ducuanj daj. Sani dugu'nun' né' ga'ui' chrej né' rian ni dugüi' né', xi'í si ni'i né' sisi gahuin nichrun' güi ga'na' Señor.

Advertencia al que peca deliberadamente

²⁶Daj si sisi hua ni'i né' nuguan' xanga', n̄i ga gue gui'yaj né' gaquin' ngaa ni'i né' sisi gaquin' huin 'yaj né', n̄i nitaj si naránj rian si-gaquin' né' mánj. ²⁷Hué dan n̄i niqui n̄in' ruhua niman né' sisi urin si ana'uij

né' huin si guí'yaj Yan'anj castigo né' gunun né' rian aca yan'an nga ni ngüi unun' nga Yan'anj. ²⁸Tsínj na'ue dagahuin si gataj si-ley Moisés, ni gahui' sí', guí'yaj si-nuguan' huij hua'nij tsínj guini'li sisi guí'yaj sí' gaquin'. Ni si nahuin 'i ruhua ni sij guini'li ni sij sí' mánj. ²⁹Ni sisi hué daj gahuin asij ná, ni nico doj gahuin castigo tsínj 'yaj quij rian da'níj Yan'anj. Ni 'yaj sij sisi nitaj si ní'yanj si-tun man'an Jesús. Ni hué si-tun man'an Jesús guí'yaj sisi gahuin sa' niman né' rian Yan'anj. Ni guí'yaj yya Yan'anj nga né' xi'f tun daj. Ni 'yaj quij sij rian Espíritu Santo. Ni hué Espíritu Santo huin si guí'yaj sinduj rian sij. ³⁰Ni ni'li né' Señor gataj: "Man'anj huin si guí'yaj castigo. Ni naru'ue daj rún' guí'yaj quij ni sij." Daj gataj Señor.

Ni gataj ruhua' yún Señor:

"Nagui'yaj yya Señor nga ni ngüi nico' man'an sij." Daj gataj Señor.

³¹Hué dan ni nuguan' xu'ui' huin si guí'ran' tsínj guí'da'a Yan'anj hua ni'na'.

³²Hué dan ni nanun ruhua á re' daj guí'yaj ni é re' ni güi gachin ngaa guxuman sini chruhua á re' ni'yaj á re' Jesús. Daj si guixiguin chruhua niman án re', guí'yaj Yan'anj. Ni gahuin nucuaj á re' guí'ran' a ni é re' sayun nico. ³³Ni ga'mi quij ni sij rian ni é re'. Ni chran' yun'unj ni sij a ni é re' rian daran' ni ngüi. Ni guinica' dugüi' a ni é re' nga ango ni dugüi' ni é re' ngaa hué daj chran' yun'unj ni sij ni dugüi' ni é re'. ³⁴Ni nani yaco ruhua á re' ni'yaj á re' ni dugüi' a ni é re' gunun ducuaga'. Ni gahuin

niá' ruhua ni é re' ngaa ga'nej ni sij si'yaj á re'. Ni hué daj guí'yaj á re' si hua ni'li a ni é re' sisi sa' doj hua si'yaj á re' mán xata'. Ni ga niganj si'yaj á re' daj. ³⁵Hué dan ni si ga'nin' ruhua á re' si guxuman ruhua á re' ni'yaj á re' Yan'anj. Daj si guí'yaj sa' Yan'anj nga á re' xi'f si xuman ruhua á re' ni'yaj á re' Yan'anj. ³⁶Ni hua nian si gunucuaj á re' nga sayun ran' ni é re'. Ngaa ni ga'ue guí'yaj á re' daj rún' huin ruhua Yan'anj si guí'yaj á re'. Ngaa sij ni nahuin ra'a á re' ni rasun daj rún' gataj yya Yan'anj rian án re'.

³⁷Daj si gataj si-nuguan' Yan'anj: Gahuin nichrun' ga'na' Señor. Ni si gahuin ran sij ga'na' sij mánj.

³⁸Tsínj hua nica niman, ni gunucuaj sij gane sij xi'f si xuman ruhua sij ni'yaj sij man'anj.

Sanj sisi duna sij si-nuguan'anj, ni si gahuin niá' ruhuaj ni'yá sij mánj.

Gataj si-nuguan' Yan'anj.

³⁹Sanj sé rún' huin ni tsínj duna si-nuguan' Yan'anj huin né' sisi gahuin né' castigo rian yan'anj mánj. Daj si huin né' ni tsínj xuman ruhua ni'yaj Yan'anj. Xi'f daj ni ganacaj Yan'anj né'.

La fe

11 Ni ngaa ataj né' sisi xuman ruhua né' ni'yaj né' Yan'anj, ni huin ruhuaj gata sisi ni'li sa' né' sisi nahuin ra'a né' si ana'uij né'. Ni gahuin yya ruhua né' nga nuguan' nun ni'li rian né'. ²Ni xi'f si guxuman ruhua ni tsínj guimán asij ná ni'yaj ni sij Yan'anj, ni ga'mi 'ueé Yan'anj xi'f ni sij.

³Ni ni'i né' sisi gui'yaj Yan'anj ni xungüi nga xata' xi'í si-nuguan'anj. Ni hué daj ni'i né' xi'í si xuman ruhua né' ni'yaj né' Yan'anj. Ni ngaa gui'yaj Yan'anj daran' ni rasun ni'i rian né', ni garáj sun Yan'anj ni rasun si ga'ue guini'i rian né'.

⁴Ni xi'í si guxuman ruhua tsínj gu'naj Abel ni'yaj sij Yan'anj, ni hua sa' ofrenda naga'ui' sij daj nga ofrenda naga'ui' jnánj sij Caín. Ni xi'í daj ni gataj Yan'anj sisi hua nica niman tsínj gu'naj Abel. Ni nahuin ra'a Yan'anj si-ofrenda sij. Hué daj ni nunj si hua gahui' Abel asij ná, sani hua gue a'mi sij xi'í si guxuman ruhua sij ni'yaj sij Yan'anj.

⁵Ni xi'í si guxuman ruhua tsínj gu'naj Enoc ni'yaj sij Yan'anj, ni nicaj Yan'anj sij gan'an xata'. Ni nun gahui' sij. Ni nun nari' ni dugüi' sij man'an sij. Daj si Yan'anj nicaj gan'anj sij xata'. Ni ataj si-nuguan' Yan'anj sisi asij ngaa achin nicaj Yan'anj gan'anj sij xata', ni ga'mi sa' Yan'anj xi'í Enoc. ⁶Sani sisi nitaj si xuman ruhua né' ni'yaj né' Yan'anj, ni si ga'ue gui'yaj né' si aran' ruhua Yan'anj mánj. Daj si sisi huin ruhua né' gahuin nichrun' né' rian Yan'anj, ni hua nian sisi guxuman ruhua né' sisi hua yya hua Yan'anj. Ni hua nian sisi guxuman ruhua né' sisi gui'yaj sa' Yan'anj nga ni ngüi nano' Yan'anj.

⁷Ni xi'í si guxuman ruhua tsínj gu'naj Noé ni'yaj sij Yan'anj, ni dagahuin 'ueé sij si gataj snan'anj Yan'anj gunun sij. Ni xi'í daj gui'yaj sij 'ngo rio xxi taj rian nnee. Ni hué daj ga'ue ganani ni dugüi' sij rian sayun ga'na'. Daj si hua gataj chrun Yan'anj gunun Noé daj gahuin

chruhua xungüi ngaa gane Noé asij ná. Ni xi'í si xuman ruhua Noé ni'yaj sij Yan'anj, ni digyán sij sisi da'ui ni ngüi guimán asij ná gaquin'. Ni xi'í si guxuman ruhua sij, ni gahuin sij tsínj hua nica niman gataj Yan'anj.

⁸Ni xi'í si guxuman ruhua tsínj gu'naj Abraham ni'yaj sij Yan'anj, ni dagahuin sij ngaa gaquin' Yan'anj gan'anj sij. Daj si gataj Yan'anj gunun sij sisi gahui sij gan'anj sij 'ngo yu'uj rian nun ni'i man'an sij. Ni yu'uj daj gahuin do'ój sij, gui'yaj Yan'anj. ⁹Ni rún' huin 'ngo tsínj 'na' ango xuman', ni da'nga' daj gane sij yo'ój daj xi'í si guxuman ruhua sij ni'yaj sij Yan'anj. Ni hua gataj yya Yan'anj gunun sij sisi ga'ue gane sij yo'ój daj. Ni gane sij 'ngo hue' atsiy nga da'níj sij Isaac nga da'ni si'ni sij Jacob. Ni daj rún' gataj yya Yan'anj si yo'ój daj gahuin do'ój Abraham, ni hué daj gataj yya Yan'anj gunun Isaac nga Jacob nej. ¹⁰Daj si ana'uij Abraham sisi gane sij ango xuman' ne' xata' rian man hue' sa' nin' ruhua. Ni Yan'anj huin si gani ruhua daj ga xuman' daj. Ni Yan'anj huin si gui'yaj ni hue' sa' daj.

¹¹Hué dan ni xi'í si guxuman ruhua yun'unj xana gu'naj Sara ni'yaj unj Yan'anj, ni gunucua' unj guiri' unj 'ngo lij. Ni gahuin unj 'ngo yun'unj xana yatin achij nin' ruhua. Ni ga'nga 'ngo lij, gui'yaj unj. Daj si guxuman ruhua unj sisi hua yya nuguan' gui'yaj yya Yan'anj nga unj. ¹²Ni achij nin' ruhua Abraham chruhua gahui' sij. Sani ducu guixi'nanj ni da'ni si'ni sij. Ni gahuin nico ni da'ni si'ni sij daj rún' hua nico ni yati' man xata' nga ni

yo'ój chru mán du'ua nnee yan'anj nej. Ni sĭ ga'ue gunucó' gayó' ni yo'ój chru da mánj.

¹³Nĭ nunj si achin nahuin ra'a ni tsĭnj guimán asij ná nuguan' gui'yaj yya Yan'anj nga ni sij, sanĭ 'ngo guxuman ruhua ni sij ni'yaj ni sij Yan'anj ngaa gahui' ni sij. Nĭ xi'í si guxuman ruhua ni sij ni'yaj ni sij Yan'anj, nĭ guini'i ni sij nuguan' sa' gui'yaj Yan'anj nga ni sij ni güi ga'na'. Nĭ gahuin niá' ruhua ni sij nga nuguan' sa' gui'yaj Yan'anj ni güi daj. Nĭ xacaj ni sij cuenta sisi tsĭnj 'na' anéj chrej huin ni sij. Nĭ sé xánj ni sij huin xungüi nan, gataj ni sij. ¹⁴Nĭ ngaa hué daj a'mi ni ngüi, nĭ nata' yya ni sij sisi nano' ni sij 'ngo xuman' gahuin xánj ni sij. ¹⁵Nĭ sisi gani ruhua ni tsĭnj daj sisi xuman' rian gahui ni sij huin xánj ni sij, nĭ ga'ue nanicaj ni sij nan' sij xánj ni sij daj. ¹⁶Sanĭ huin ruhua ni sij 'ngo xuman' sa' gane ni sij daj nga xánj ni sij. Nĭ xuman' sa' daj huin xata'. Xi'í daj nĭ nitaj si na'aj Yan'anj gahuin Dan'anj ni sij. Daj si hua gui'yaj xugüi Yan'anj 'ngo xuman' rian guĭman ni sij huin xata'.

¹⁷Nĭ xi'í si guxuman ruhua Abraham ni'yaj sij Yan'anj, nĭ guida'a sij da'nĭj sij Isaac. Nĭ ga'uej ruhua sij dagahui' sij urin da'nĭj sij naga'ui' sij sí' rian Yan'anj. Daj si xacaj Yan'anj da'nga' si gui'yaj Abraham. Nĭ hua gui'yaj yya Yan'anj 'ngo nuguan' nga Abraham xi'í Isaac. ¹⁸Nĭ hua gataj snan'anj Yan'anj gunun Abraham: “Guini'i ni ngüi ni da'ni si'nĭ re', gui'yaj da'nĭj re' Isaac.” Daj gataj Yan'anj rian Abraham. ¹⁹Nĭ gani ruhua Abraham

sisi ga'ue gana'nij ni níman, gui'yaj Yan'anj. Doj nĭ dagahui' Abraham da'nĭj sij. Sanĭ na'uej ruhua Yan'anj sisi gahui' Isaac. Ngaa nĭ güenda Abraham, nĭ rún' huin sisi hua gahui' da'nĭj sij. Sanĭ nahuin ra'a ruhua' yún sij da'nĭj sij.

²⁰Hué dan nĭ xi'í si guxuman ruhua tsĭnj gu'naj Isaac ni'yaj sij Yan'anj, nĭ ga'mi sij 'ngo nuguan' sa' xi'í si gahuin nga nungüej da'nĭj sij Jacob nga Esaú ni güi ga'na'.

²¹Nĭ xi'í si guxuman ruhua tsĭnj gu'naj Jacob ni'yaj sij Yan'anj, nĭ ga'mi sij nuguan' sa' xi'í si gahuin nga nungüej da'nĭj José. Nĭ hué daj gui'yaj sij ngaa ruhua gahui' sij. Nĭ ga'mi sa' sij rian Yan'anj ngaa runun sij chrun huaj sij.

²²Hué dan nĭ xi'í si guxuman ruhua José ni'yaj sij Yan'anj, nĭ gataj snan'anj sij sisi hua güi, nĭ gahui ni ngüi israelita yo'ój Egipto gan'anj ni sí'. Nĭ hué daj gui'yaj sij ngaa ruhua gahui' sij. Nĭ ga'nin' sij sun daj gui'yaj ni sí' nga si-cúj sij.

²³Nĭ xi'í si guxuman ruhua chrej Moisés nga nni sij ni'yaj nungüej nica sí' Yan'anj, nĭ garij huĭ nungüej nica sí' chra hua'nij yahuĭ sij ngaa ga'nga sij. Daj gui'yaj nungüej nica sí', si guini'i nungüej nica sí' sisi niá' hua sij. Nĭ nun guxu'ui' nungüej nica sí' ngaa ga'nin' rey sun rian ni ngüi sisi gahui' daran' ni da'ni sno'o ni sij.

²⁴Nĭ xi'í si guxuman ruhua Moisés ni'yaj sij Yan'anj ngaa gachij sij, nĭ na'uej ruhua sij si gataj ni ngüi sisi da'nĭj da'ni xana rey nne Egipto huin sij mánj. ²⁵Sanĭ garan' ruhua sij guĭran' sij sayun nga ni tsĭnj nico' Yan'anj. Daj si na'uej

ruhua sij gahuin nia' ruhua sij doj yo' nga ni gaquin' gui'yaj ni tsínj guimán Egipto. ²⁶Ni ga'nin' ruhua sij sisi ga'mi quij ni ngüi rian sij xi'f si nicaj dugüi' sij nga Cristo. Daj si gani ruhua sij sisi sa' si-nuguan' Cristo daj nga daran' rasun sa' man yo'ój Egipto. Ni guini'i sa' sij sisi gui'yaj sa' Yan'anj nga sij. ²⁷Ni xi'f si guxuman ruhua Moisés ni'yaj sij Yan'anj, ni gahui sij Egipto gan'anj sij. Ni nun guxu'ui' sij si ga'man ruhua rey daj ni'yaj sí' sij. Ni nunj si nun guini'i rian sij man'an Yan'anj, sani gahuin nica ruhua sij nga si-chrej Yan'anj. Daj si guini'i sa' niman sij sisi niquin' Yan'anj nga sij. ²⁸Ni xi'f si guxuman ruhua Moisés ni'yaj sij Yan'anj, ni gui'yaj sij gui'yanj Pascua. Ni ga'nin' sij sun sisi gan'anj gari ni sij tun xachij rian ni hue'. Ngaa ni si gahui' ni da'nij ni tsínj israelita, ni si xahua', gui'yaj ángel huin ángel 'yaj ahui' ni ngüi.

²⁹Hué dan ni xi'f si guxuman ruhua ni tsínj israelita ni'yaj ni sij Yan'anj, ni gachin ni sij anéj chrej du'ua nnee yan'anj gu'naj Nnee Yan'anj Mare. Ni yo'ój naco huin rian gachin ni sij dani nnee yan'anj daj, gui'yaj Yan'anj. Sani ngaa gahuin ruhua ni tsínj man Egipto gachin ni sij rian gachin ni tsínj israelita, sani gahui' ni sij chruhua nnee, gui'yaj nnee daj.

³⁰Ni xi'f si guxuman ruhua ni tsínj israelita ni'yaj ni sij Yan'anj, ni gane xingá yej xxi ganicaj du'ua xuman' Jericó, gui'yaj Yan'anj. Ni guisij ichij güi gachéj ni tsínj israelita ngaa ganicaj ni sij rucú xingá yej xxi daj.

³¹Ni Rahab huin 'ngo yun'unj xana achéj man'an. Ni xi'f si guxuman ruhua unj ni'yaj unj Yan'anj, ni nun gahui' nuguan'an unj nga ni ngüi nun dagahuin rian Yan'anj daj. Daj si ga'nij unj ducua unj gatu huij tsínj israelita huin nungüej sí' tsínj huin ruhua guini'i daj hua xuman' Jericó.

³²Ni daj hua ango nuguan' gatā ruhua á re' únj. Nun riquij tiempo garünj xi'f tsínj gu'naj Gedeón nej, Barac nej, Sansón nej, Jefté nej, David nej, Samuel nej nga ni tsínj ga'mi si-nuguan' Yan'anj asij ná.

³³Ni xi'f si guxuman ruhua ni sij ni'yaj ni sij Yan'anj, ni gui'yaj gana ni sij rian ni rey guimán asij ná. Ni sa' gui'yaj yya ni sij si-gaquin' ni ngüi. Ni guiri' ni sij nuguan' gui'yaj yya Yan'anj nga ni sij. Ni naránj ni sij du'ua ni sigue'ej xxi nej. ³⁴Ni dina'aj ni sij yan'an huee nun gaca ni sij, gui'yaj yan'an daj. Ni ganani ni sij rian ni tsínj ata espada nano' dagahui' ni sij. Ni ngaa ninaj ni sij, ni nari' fuerza ni sij, gui'yaj Yan'anj. Ni gahuin nucuj ni sij gui'yaj gana ni sij scanij ni sayun ngaa uda' ni sij nga ango xuman'. Ni gunucuj ni sij gui'yaj gana ni sij rian ango xi'nin' xxi ni tsínj unun' nga ni sij. ³⁵Ni hua dugüi' ni ngüi xana ganá'nij scanij ni níman, gui'yaj Yan'anj.

Ni guiran' ango ni sij sayun, gui'yaj ni tsínj ga niqui hua. Ni na'uej ruhua ni sij sisi gahuin ní'nij ni sij rian ni tsínj xi'i daj. Daj si huin ruhua ni sij gana'nij sa' ni sij scanij ni níman. ³⁶Ni guiran' ango ni sij sayun. Daj si ga'mi ducu ni ngüi rian ni sij. Ni duguayun ni sí' nne' ni sij. Ni numij ni sí' cadena

ni sij. Ni garij ni sí' ducuaga' ni sij. ³⁷Ni ga'ui' ni ngüi' yej da'aj ni sij. Ni ga'nin' ni sí' cera a'nin' chrun da'aj ni sij. Ni gahui' ango ni sij, gui'yaj espada. Ni nun ni sij nnij xachij nga nnij stane gachéj ni sij go'ngo yu'uj rian quij. Ni yaco guiran' ni sij. Ni nico' huaj guiran' ni sij sayun. Ni chran' yun'unj ni ngüi' ni sij nej. ³⁸Ni xi'í si sa' niman ni sij, ni nun ní'yanj ni ngüi' man chruhua xungüi' nan sisi gane ni sí' scanij ni sij. Ni gachéj huí ni sij riqui quij gui'yanj naco nga riqui ango quij nej. Ni guimán huí ni sij chruhua huej nga chruhua yu'uj taj riqui yo'ój nej. ³⁹Hué dan ni nunj si ga'mi sa' Yan'anj xi'í si guxuman sa' ruhua ni sij ni'yaj ni sij Yan'anj, sani nun nahuin ra'a ni sij nuguan' gui'yaj yya Yan'anj ga'na' rian ni sij. ⁴⁰Daj si hua gani sini ruhua Yan'anj daj gui'yaj sa'aj nga né'. Daj si huin ruhua Yan'anj sisi guinicaj dugüi' né' nga ni sij gahuin nica niman daran' né', gui'yaj Yan'anj.

Puestos los ojos en Jesús

12 Hué dan ni xi'í si man nico ni tsínj xuman ruhua ni'yaj Yan'anj, ni da' ganicaj ni sij xi'níj né' ni'yaj ni sij daj 'yaj né', ngaa ni duna né' 'ngo yu'uj daran' ni rasun chran' yun'unj né'. Ni hué daj duna né' daran' ni gaquin' ya'í ata né'. Ni daj rún' 'yaj ni tsínj unánj ngaa huin ruhua ni sij gui'yaj gana ni sij rian dugüi' ni sij, ni hué daj gui'yaj fuerza né' si-chrej Yan'anj. Sani gahuin din'inj né' gache né' chrej daj. ²Ni ga'nij né' rian né' rian nne Jesús. Daj si hué sij gui'yaj si guxuman ruhua né'

ni'yaj né' Yan'anj. Ni hué sij gui'yaj sisi guxuman niganj ruhua né' ni'yaj né' Yan'anj. Ni guiran' Jesús sayun ngaa guinico' sij rian rugutsi. Sani nun nahuij ruhua sij guiri' sij si-na'aj, si hué daj gahui' sij rian rugutsi. Daj si hua ni'í sij sisi ngaa guisij guiran' sij sayun daj, ni nin' ruhua gahuin nia' ruhua sij. Ngaa ni gan'anj gane sij ne' chrej ra'a sa' Yan'anj xata'. ³Ngaa ni gani ruhua á re' daj guiran' Jesús. Daj si guiran' sij nico sayun, gui'yaj ni tsínj xi'í huin ni tsínj 'yaj gaquin'. Xi'í daj ni si guinichre ni é re' si-chrej Yan'anj. Ni si guinaj niman an re' manj. ⁴Ni unun' yya ni é re' nga sichre xi'í si na'uej ruhua á re' gui'yaj á re' gaquin'. Sani nun gahuin gayanj si-tun man'an an re' xi'í si-nuguan' Yan'anj manj. ⁵Ni guini'yun ruhua ni é re' nga ducuanj digyan Yan'anj rian an re' rún' huaj. A'mi Yan'anj rian né' rún' huin da'níj Yan'anj huin né'. Ni gataj si-nuguan' Yan'anj:

Da'ní huin re'.

Ni si gani ruhua re' si nitaj si ní'yanj castigo 'yaj Señor nga re'.

Ni si guinichre ruhua re' ngaa digyan Señor si-gaquin' re' rian re' manj.

⁶Daj si a'nin' Señor chrej rian ni tsínj 'i ruhua sij.

Ni daran' ni tsínj nahuin ra'a Yan'anj huin da'ni, ni huin ni sij castigo, 'yaj Señor.

Daj gataj si-nuguan' Yan'anj.

⁷Ga'nin' ruhua á re' nga castigo 'yaj Yan'anj nga ni é re'. Daj si 'yaj Yan'anj sisi ni é re' huin da'ni. Ni daran' ni tsin' ni huin castigo, 'yaj

ni chre. ⁸Ni 'yaj Yan'anj castigo daran' ni da'ni. Ngaa ni sisi nitaj si huin ni é re' castigo, 'yaj Yan'anj, ngaa ni sé si hua yya huin ni é re' da'nij Yan'anj mánj. Sani huin ín re' ni tsínj nitaj chrej.

⁹Ni ango nuguan' huin sisi ngaa ga lij né', ni gahuin né' castigo, gui'yaj chrej né'. Xi'í si gui'yaj ni sij daj, ni a'mi sa' né' xi'í si gui'yaj ni sij. Ni sisi hué daj dagahuin né' rian chrej né' man chruhua xungüi nan, ni un sin huin, ni nun dagahuin sa' né' doj rian chrej niman né' nne xata' únj. Daj si sisi hué daj gui'yaj né', ni gane niganj né' nga Yan'anj anj. ¹⁰Doj gue güi gui'yaj ni chrej né' castigo né'. Ni gui'yaj ni sij nga né' daj rún' huin ruhua ni sij. Sani 'yaj Yan'anj castigo né' güenda si gahuin sa' niman né' daj rún' hua sa' niman man'an Yan'anj. ¹¹Hué hora ngaa ran' né' castigo, ni nitaj si hua nia' ruhua né'. Maan si nani ruhua né' 'yaj. Sani da rucu, ni gahuin chrún né', 'yaj castigo daj. Ni ga'ue gache né' 'ngo chrej nica. Ni gahuin din'inj ruhua né' nej.

Los que rechacen la gracia de Dios

¹²Ngaa ni gui'yaj ni é re' sisi nari' ruhua ni é re'. Ni gui'yaj ni é re' sisi guisiqui' ra'a ni é re'. Ni nagui'yaj ran ni é re' dacój ni é re' sisi gache sa' ni é re' si-chrej Yan'anj anj. ¹³Ni nagui'yaj sa' á re' chrej nica gache ni é re'. Ngaa ni si guduna dacój tsínj yacuan daj ango chrej gache sij mánj. Sani nahuin dacój sij gui'yaj chrej nica daj, gui'yaj á re'.

¹⁴Dugu'nun' a ni é re' si ga din'inj gane a ni é re' nga daran' ni ngüi. Ni dugu'nun' a ni é re' si gahuin sa'

niman án re' rian Yan'anj. Daj si sisi nitaj ga sa' ruhua né', ni si guini'i né' Señor mánj. ¹⁵Ni ga cuidado ni é re' sisi ni a 'ngo ni é re' si duna sinduj gui'yaj Yan'anj xi'í né'. Ni ga cuidado ni é re' sisi si guixira' 'ngo ya'a yai' scanij a ni é re'. Ni ya'a yai' daj huin 'ngo tsínj nan'an ruhua ni'yaj dugüi' sij. Daj si tsínj daj 'yaj sisi uyan ga quij niman ni dugüi' sij daj rún' hua man'an sij. ¹⁶Ni a 'ngo ni é re' si ga'mi nga squira' mánj. Ni si gani ruhua á re' sisi sé si sa' si 'na' rian Yan'anj mánj. Daj si hué daj gui'yaj tsínj gu'naj Esaú huin sij si xahua'. Sani guru'ue sij si-sun sij rian jnánj sij Jacob sisi natu sí' rian sij gahuin sí' tsínj huin achij. Ni urin nia ga'ui' Jacob xa jnánj sij Esaú. Xi'í daj ni ga'uej ruhua Esaú sisi gahuin Jacob tsínj huin achij. ¹⁷Ni ni'i a ni é re' daj gahuin nga Esaú da rucu. Ni huin ruhua sij nahuin ra'a sij sinduj ga'ui' chrej sij rian sij. Ni nunj si gaco sij, sani nun ga'ui' chrej sij si achínj sij. Daj si nun ri' ruhua chrej sij si gui'yaj sí' si hua gui'yaj chrej sij sinduj rian jnánj sij Jacob.

¹⁸Ni sé si guiran' án re' daj rún' guiran' ni xi né'. Daj si gahuin nichrun' ni sij 'ngo quij rian naga'ui' Yan'anj si-ley rian ni sij. Ni quij rian gahuin nichrun' ni sij, ni anun yan'an. Ni hua rumi' nej. Ni garánj nga maru chra quij daj. Ni gahui 'ngo nane xxi. ¹⁹Ni nucuaj ga'yanj 'ngo trompeta. Ni gunun ni sij si ga'mi Yan'anj. Ni ga'mi yaco ni tsínj gunun nuguan' daj sisi si ga'mi Yan'anj nga ni sij ga mánj. ²⁰Daj si na'ue gunucuaj ni sij nuguan' ga'nin' Yan'anj sun rian ni sij, ruhua

ni sij. Daj si gataj Yan'anj gunun ni sij: "Sisi gatu da 'ngo xucu quij daj, ni dagahui' ni é re' nga yej, asi nga lanza." Daj gataj Yan'anj gunun ni sij. ²¹Ni ducu guxu'ui' ni sij gui'yaj si guini' ni sij. Xi'í daj ni gataj Moisés: "Nagunanj man'anj 'yaj si xu'uij." Daj gataj Moisés.

²²Ni sé rian quij daj gahuin nichrun' ni é re' manj. Sani gahuin nichrun' a ni é re' rian quij gu'naj Sión. Ni yu'uj daj huin xánj Yan'anj hua ni'na' huin xuman' Jerusalén naca ngaj xata'. Ni man ga'li mí ni ángel nahuin yu' yu'uj daj. ²³Ni nahuin yu' a ni é re' nga daran' ni da'nij Yan'anj. Ni daj rún' tsínj xahua' huin ni sij. Ni taj si-xugüi ni sij chruhua libro táj xata'. Ni gahuin nichrun' ni é re' rian Yan'anj. Ni hué Yan'anj huin si gui'yaj yya rian si-gaquin' daran' ni ngüi. Ni yu'uj daj nne ni niman huin ni tsínj hua nica niman. Ni Yan'anj gui'yaj sisi gahuin sa' ni sij. ²⁴Ni gahuin nichrun' né' rian Jesús huin tsínj gui'yaj yya nuguan' naca nga né'. Ni ganahuin sa' niman né', gui'yaj si-tun man'an sij. Ni sa' gui'yaj si-tun Jesús daj nga si gui'yaj si-tun tsínj gu'naj Abel.

²⁵Ngaa ni ga cuidado ni é re' sisi si danicaj ni é re' nuguan' ga'mi Yan'anj. Daj si sisi nun ganani ni tsínj danicaj nuguan' ga'mi Yan'anj chruhua xungüi asij ná, ni si ga'ue ganani né' yyaj sisi danicaj né' nuguan' a'mi Yan'anj xata' rian né'. ²⁶Ni ngaa ga'mi Yan'anj asij ná, ni nagunanj yo'ój, gui'yaj. Sani yyaj ni gataj yya Yan'anj gunun né': "Ango rin yun nagunanj yo'ój, gui'yā. Ni sé urin yo'ój nagunan',

sani nagunan' xata', gui'yā nej." Daj gataj Yan'anj. ²⁷Ni ngaa gataj Yan'anj nuguan': "Ango rin yun", ni huin ruhuaj gata sisi ga'ne Yan'anj daran' ni rasun ga'ue guisiqui' huin ni rasun gui'yaj Yan'anj ni'yaj né'. Ngaa ni guna ni rasun si ga'ue guisiqui' huin ni rasun nun rugüi' ni'yaj né'. ²⁸Ni si ga'ue guisiqui' rian nicaj Yan'anj sun. Ni riqui Yan'anj si gane né' yu'uj daj. Xi'í daj ni ga'ui' né' si guruhua Yan'anj. Ni gui'yaj sun né' rian Yan'anj. Ni ga'mi sa' né' rian Yan'anj. Ni guinun yan'anj né' rian Yan'anj. Ngaa ni garan' ruhua Yan'anj xi'í si 'yaj né'. ²⁹Daj si daj rún' huin 'ngo yan'an nico anun, hué daj huin Yan'anj nico' né'. Ni hué yan'an daj gui'yaj sisi gaca daran' rasun quij.

Deberes cristianos

13 Ngaa ni 'ngo gahuin li ruhua ni é re' guini' a ni é re' ni dugüi' a ni é re'. ²Ni si guini'yun ruhua ni é re' gui'yaj sa' ni é re' nga ni ngüi 'na' anéj chrej. Daj si asij hua ná, ni gan'anj go'ngo ni tsínj 'na' chrej ducua' ni tsínj daj. Sani nun guini' ni tsínj daj sisi ángel huin si huaj. ³Ni gananun ruhua á re' ni'yaj á re' ni jnánj né' nun ducua'ga'. Ni gani ruhua á re' sisi nun nuguan'an án re' nga ni sij. Ni hué daj gui'yaj á re' nga ni tsínj chran' sayun 'yaj ni ngüi. Ni gani ruhua á re' sisi hué daj ga'ue guiran' án re', gui'yaj ni ngüi nej. ⁴Ni gani ruhua daran' né' sisi hua 'ueé ngaa xacaj dugüi' 'ngo tsínj nga yun'unj xana. Sé si na'aj huin manj. Ni sé gaquin' huin sisi gatoj nuguan'an nungüej nica 'ngo tsínj daj. Sani

gui'yaj Yan'anj castigo ni ngüi a'mi nga squira'. Ni hué daj gui'yaj Yan'anj castigo nga ni ngüi a'mi nga nica dugüi'. ⁵Ni si gahuin 'i ruhua á re' ni'yaj á re' san'anj mánj. Sani gahuin nia' ruhua á re' nga si nicaj á re'. Daj si hua gataj Yan'anj gunun né': "Nitaj aman dunā á re'. Ni nitaj aman gahuin nini a ni é re' riānj mánj." Daj gataj Yan'anj.

⁶Xi'í daj ni ga'ue gahuin yya ruhua né' gataj né':

Señor huin si chracuij man'ānj.

Ni xi'í daj si guxu'uij si nitaj nunj gui'yaj ni sij man'ānj.

Gataj né'.

⁷Ni ganunun ruhua á re' ni'yaj á re' ni tsínj huin achij huin ni tsínj ga'mi si-nuguan' Yan'anj scanij ni é re'. Ni gani ruhua á re' daj gahuin sa' si-chrej ni sij. Ni gui'yaj á re' daj rún' gui'yaj ni sij guxuman ruhua ni sij ni'yaj ni sij Yan'anj.

⁸Daj rún' gahuin Cristo asij ná, ni hué daj huin sij yyaj. Ni hué daj gahuin sij niganj nin'.

⁹Ni si duna á re' si guxuman ruhua á re' ango rian nuguan' digyan ni sij rian án re' mánj. Daj si nini huin nuguan' naca a'mi ni sij. Dugu'naj huin sisi gahuin nucaj niman né' xi'í sinduj 'yaj Yan'anj rian né'. Daj si digyán go'ngo ni sij sisi gahuin nucaj niman né' xi'í ni rasun xa né'. Sani sé si sa' si ataj ni sij mánj. Ni nun gahuin sa' niman ni sij 'yaj nuguan' da mánj. ¹⁰Ni unánj guitsi ni chrej rian dagahui' ni sij xucu rian Yan'anj. Sani gahui' Cristo xi'í né'. Ni nitaj si guinica dugüi' ni chrej daj nga Cristo daj rún' nicaj dugüi' né' nga sij. ¹¹Ni nicaj chrej a'nin' si-tun ni

xucu daj huaj sij rian hua sa' nin' ruhua. Ni rún' huin ofrenda huin sisi ga'ne tun daj si-gaquin' ni ngüi. Sani nicaj ni sij xucu gahui' daj huaj ni sij ne' chrej xe' xuman' daj gari yan'an ni sij. ¹²Ni hué gue daj guiran' Jesús sayun gahui' sij ne' chrej xe' du'ua xuman' Jerusalén. Ni hué daj gui'yaj Jesús sisi gahuin sa' niman ni ngüi rian Yan'anj, gui'yaj si-tun man'an sij.

¹³Ngaa ni daj rún' guiran' Jesús sayun ne' chrej xe' du'ua xuman' daj, ni ga'nin' ruhua né' sisi hué daj guiran' né' nej. Ni ga'nin' ruhua né' sisi ga'mi quij ni ngüi xi'í né' si hué daj ga'mi quij ni sij rian Jesús. ¹⁴Daj si si gane niganj né' xuman' man né' chruhua xungüi nan mánj. Sani nana' né' ango xuman' rian gane niganj né'. ¹⁵Hué dan ni xi'í si gui'yaj Jesús, ni 'ngo ga'mi sa' né' rian Yan'anj xi'í si gui'yaj 'ueé Yan'anj nga né'. Ni daj rún' naga'ui' ni sij xucu rian Yan'anj, ni hué daj gui'yaj né' nga nuguan' sa' ga'mi du'ua né' rian Yan'anj. ¹⁶Si guini'yun ruhua á re' gui'yaj sa' á re' nga ni dugüi' ni é re'. Ni chracuij a ni é re' ni dugüi' a ni é re'. Ni aran' ruhua Yan'anj sisi hué daj gui'yaj né'. Ni rún' huin sisi a'ui' né' rasun rian man'an Yan'anj ngaa chracuij né' ni dugüi' né'.

¹⁷Dagahuin sa' á re' rian ni tsínj huin achij rian án re'. Ni gara xina ni é re' si a'mi ni sij. Daj si hué ni sij dugumi niman ni é re'. Ni hua nian si naga'ui' ni sij cuenta daj gui'yaj go'ngo a ni é re' rian Yan'anj. Ngaa ni dagahuin sa' á re' sisi gahuin nia' ruhua ni sij nga si-sun ni sij. Ni si gui'yaj á re' sisi nani ruhua ni sij.

Daj si sisi na'ue dagahuin sa' á re' rian ni sij, ni si ga'ue guiman sa' á re' mánj.

¹⁸Gachinj jni'yaj á ni é re' rian Yan'anj xi'í únj. Gahuin yya ruhua únj sisi nitaj da'ui únj gaquin'. Ni huin ruhua únj gui'yaj sa' únj nga daran'anj. ¹⁹Ni huin ruhuāj sisi gachinj jni'yaj á re' rian Yan'anj sisi ruhua Yan'anj, ni guchi' rá'yān rian man ni é re' aj.

Bendición y saluciones finales

²⁰Yan'anj 'yaj sisi hua din'inj ruhua né!. Ni Yan'anj gui'yaj sisi ganá'nij Señor Jesucristo scanij ni níman. Ni Jesucristo huin 'ngo tsínj huin rian nin' dugumi né!. Ni daj rún' dugumi 'ngo yucuj dánj sij xachij, ni hué daj dugumi Jesucristo né!. Ni gayanj si-tun man'an Jesucristo xi'í nuguan' gui'yaj yya Yan'anj niganj nin' nga né!. ²¹Ni huin ruhuāj sisi gui'yaj Yan'anj sinduj rian án re'. Ngaa ni ga'ue gui'yaj á re' daran' sun sa'. Ni ga'ue

gui'yaj á re' si huin ruhua Yan'anj gui'yaj á re' nej. Ni huin ruhuāj sisi xi'í Cristo, ni gui'yaj Yan'anj nga né' daj rún' aran' ruhua man'an Yan'anj. Ni ga'mi sa' né' niganj nin' xi'í Cristo. Amén.

²²Achínj jni'yā rian án re' sisi si ga'man ruhua á re' nga chrej digyānj rian án re' huin ín re' jnān nga xica'uī. Daj si sé si nico nuguan' arūnj rian yanj gaya a ni é re' mánj.

²³Xacaj á re' cuenta sisi hua gahui jnánj né' Timoteo ducuağa'. Ngaa ni sisi guisij yoo sij riānj, ni nicā sij huā, ni guchi' ni'yaj nungüej únj rian man án re'.

²⁴A'nī 'ngo nuguan' huaj rian daran' ni tsínj huin achij scanij a ni é re' nga rian daran' ni ngüi hua sa' rian Yan'anj huin ni ngüi nico' Yan'anj. Ni a'nij ni tsínj 'na' estado Italia 'ngo nuguan' rian án re' nej.

²⁵Ni huin ruhuāj sisi gui'yaj Yan'anj sinduj rian daran' ni é re'. Amén.